

HIBULU

Koyoto epi'ehina fayahi

**Hu'mau pana'amofifi baga'a le'mo babahi
higo ka lamana'a lu limi'ehina**

1 ¹Hu'mau ai koyapa'i mono ka lol'i'ali bo enabaga le'mo babahi hu epalago enali enigiko enagakomagihi ka'a fato fato'mofifi kapo'a fato fato'mofifi lu epite biba biba hi'ahana. ²To kana'a su halube'mu nohinogo ya'ma kana yatai pana'amofifi baga'a le'mo babahi higo ai ka legeya'a lu huto huto lu limi'ehina. Pana'a ai asaga melugu nasanamofifi afo'afu lolo huto minalibe luto lu eto'ehina bomofifi ai yanuguko mololago yamofifi silaga nasana huto hu'ehina. ³Hu'mamofifi fana meha'amofifi sekele mamu'a hiti fuluna'a aitoga fi besa lo'ehinamo ni'ibe. To Hu'mau minoto lito hu'ehinamofifi legege hu'ehinamofifi aitoga ni'ina yanamofifi amuya'alo molo kehelito lulata nohina kaga'a yauba melugu kokulumagu ana'ina silaga'i le'mo hetofa hulata nohibe. Ai'a ya'ma foipanati nokala hu letolata nohina foya'a li su hoto ifoga gihihi bo amuya'a hiti enebe ligi'ehina bo Hu'ma ai nohinalo lamaga'aga buto mino moloto mino'ehina yabe.

Pana'aub a agelo enebe ligi'ehinamofifi ka'a

⁴Ai buto minoto agelo enebe ligi su ho'ehina yamofifi legegeto ya'ma Hu'mau emi'ehina gi'auba agelomagihi enigi'ani be ligito tigo mino'ehina gi'a li'ehina. ⁵Ya hu'ehina'mu Hu'mau ka mone pana'a lu'ehina ya'ma agelo mone'mofifi ma luto kaga lu emi'ehinamo meni'igo pana'a aisigo kumu ma luto lu emi'ehinaya fayahi keye'ahana:

Kai ya'ma pana'ni nohatagihe.

Nani'ni ya'ma yata'isi

kele'mo huto hu'ohube.

To agelo mone'mofifi ma luto meemi'ehina:

Nani ya'ma afo'afita lolo huto

nohunagihe.

To ai ya'ma pana'ni lolo huto minalibe.

⁶Mone ya'ma minoto kohe toto pana'a ho lifinogo melugu limilube'mu
nohigo pana'amofifi kaga'a ma luto lu'ehina:

Hu'mamofifi agelo bona'a enali asaga'i

lipi emite foke ka li emilabe.

⁷To Hu'mau agelo bona'magi kumu ma luto lu'ehinamo ni'ibe:

Hu'mau ligo

ai agelo bona'magihi babeyafalo

li gelehe higo

yasi enemeхи lolo hite nehabe.

To agelo'a

ya'ma koko pana'amagihi enemeхи

li gelehe higo

logo guluya mepofifi enemeхи lite

lolo hite nehabe.

⁸To ya hu'ehinaya pana'amu ya'ma ma luto lu'ehinamo fayahi
keye'ahanamo ni'ibe:

Oho, Hu'mao. Kai kefa hisa amuya'a hiti

ya'ma minomo buto minalina'mu yabe.

To enali amuya'amofifi fatusa'a

lito minoto

enali foya hapa'alo le'mo fotogo huto

kaba hulata nohane.

⁹ ai ya'ma lamana kamofifi

kibita hulata nohibe.

To anal'ina foipanamofi kumu

fatehi lolo hu etolata nohane.

Ya hu'ehina'mu

Hu'mau, afokafu, kele'mo ho ti'ehinagi

to gelo bise'namofifi

kimi'ehinauba kalalukafifi

enebe ligi'ehigo

hofa tose'naka sipi huto hu'ehinagihe.

¹⁰Mone'ya Hu'mau ma luto lu'ehina ni'ibe:

Sipi Bo, kai koyapa'i lili'na kana'agu

asaga'i yata'a me'i hiti

anagu neminana hiti lolo hu'ahata.

To kokuluma hiti anagu neminana hiti

kayahakatu lolo hu etolata nohane.

¹¹ Me'mo hiti kokuluma hiti

asaga ana'ina'mu fa'mene minete

alipo fenene hilana'mu yabe.
 Aku kaika mino amuya moloto
 minalube'mu hane.
 Enali ya'ma i kololo bilata gukete
 ya suhi lolo hite minete
 tafa lalune'mu habe.

¹² I kololo bilata gukete
 ya suhi lolo hite nehinogo
 kaika ya'ma gololo ti'ahanamofihu
 li kakito moloto
 kosaba'na li lolo hilube'mu hane.
 Kaika nohatanamofihu ana suko huto
 tafa melose minalube'mu hane.
 To kufu kanaka ya'ma mino lito buto
 mele'isi su mehalina'mu yabe.

¹³ Hu'mau ai'a pana'amofihu lu emi'ehina ka'a ya'ma agelo mone'i ai
 ya'ma luto lu emilina'a meni'ibe:

Kai oto
 lamaga'niga mino lito buto nohitogo
 fatehaka enele'mo tulu hinogo
 kigigusa'aluga minalana'mu yabe.

¹⁴ Ya luto agelomagihu lu meepi'ehinamo ni'ibe. Agelo silaga'i
 enali meha'a hiti Hu'mamofihu kele kele'a nehanaya bona'i enubuto
 bilatanamagihu enehe'mete enele'mo bati hilabe luto Hu'mau enoho
 nolifibe.

Lubuto bilata nasana inomo tito mino'ehina

2 ¹ Ya hu'ehina'mu lali laga mehina kapo legeso huto bili lalune luto
 ka'a keheli'ohutamo ya'ma aku'i le'mo kosaba huto amuya moloto
 li pili koto kehelito minalune. ² Agelomagihu enabagaguti kaga keya
 ka keye'ahana yanauba legeya'a lolo higo lusi kaga huto hu'ehina'mu
 bona'i moneuba ana agelomagihu kaga'ani hauta holatana ya'ma to
 keheli he'mito hega holatanamofihu hapa'a huto nohigo ya'ma foipana'a
 hiti ni'inaya yamofihu mone kegi'a foipana nona'a ali'ehinamo ni'ibe.
³ Ya hu'ehina'mu laliti hena huto lubuto bilatana tito mino'ehinamofihu
 he'minogoti buto fa'menena lolo hilina ni'ibe? To yata'a ai'a Sipi Bouba
 kana'amu kana'amu moloto lubuto bilatanamofihu kaga'a lu yege hoto
 molo'ehinamo yamofihu enegekesatu yigi hokolo hite keheli'ahana'a enali
 lu limi limi hago amuya molo'ehinamo ni'ibe. ⁴ Ya nohigo ana kanagu
 Hu'mau ya'ma lubuto bilatanamofihu kaga'a lusiga lu'ehinamoya ai'a fato
 fato suhi to amuya'amofihu nasana to topa hose'namofihu ana'ina kosaba'i
 to babeyafa'alo fato fato'i li huto huto molo'ehina yabe. To Hu'mau ai lu

kehelito ya'ma Sikalafu'mofifi nasana amuya'a ai'a lu'ehinalo moloto guna ito limi'ehina yabe.

Yesu lubuto bilatanamofifi Sipi Bo'a nohibe

⁵ To me'i kosaba'na alahi huto hilina yanamofifi ka'a lali noluta ya'ma Hu'mau agelo enali kaba hilabe luto enele'mo ho tito melu epolo'ehina yabe. ⁶ Ya huto meni'ibe. Mono bukugu bo moneuba yamofifi ka'a Hu'mamofifi lu emi'ehina ka'a ma luto lu'ehina:

Oho, Hu'mau bona'i ya'asimaka ya'ma
henana'animu keheli epilata nohane?
To bona'i ya fa'mene hana'amagihi
henabe luto enele'mo bati huto
kaba nohane?

⁷ Yamofifi kana'a hupasi hinogo
kai bona'i lebato agelomagitoga
legege hu epolo'ahane.
Kai gihiti bomofifi gi'alotii
sekele mamu'a hiti
liyafa huse'na'a hiti
bona'magihi epi'ahatamo ni'ibe.

⁸ To kai bona'i
enali silaga'namofifi kaba hi epalana'mu
enele'mo hofa to'ahane.

Ya'ma Hu'mau bona'mu silaga'namofifi kaba hi epalanamoya, ya luto lu'ehina'mu bona'magi ana'ina enamaha'aluga mele'ahana silaga'na yabe luto lu hokolo huto lu'ehina. Aku yatai kana'a ya'ma silaga nasana enamaha'aluga melete kaba hi'ahana'mu bu megalata nohune. ⁹ Ya huto Yesu bu go fe luto kehelilata nohune. Kana'a hupamone ya'ma agelomagihu enalitogati limito minoto Hu'mau lehe'mose'namu keke'i luse'na kehelito fili'ehina yabe. Asaga bona kumu yabe luto fili'ehina. Ya'ma fili'ehinanamofifi gabu gise'namu Hu'mau le'mo hofa tago fana meha'a hiti gi'amo li saga huse'na hiti aitoga huto hu'ehina bu golata nohune. ¹⁰ To Hu'mamofifi nasana'a silaga'i yanauba aitoga agoya hu etoto minalibe luto ana'ina silaga'i yanamofifi afo'afu lolohuto minoto ai'a panala'i pana'i silaga'i sekele mamu'a hiti fana mehena molo epalalube luto keheli'ehina. Ya nohuto Yesu kohe tose bouba enubuto bilatanamofifi Sipi Bo ai'a keke'i luse foya liloto buto li so kito minalane luto Yesuhi lu eto'ehinanamofifi batu hu'ehina yabe.

¹¹ To bona'i foipana'ani li he'mi epololata to komopa'ani le'mo bati hulata nohina bo ai hiti to enele'mo lamana hu'ehina bona'i hiti enali afo'anifu moneko'i nohibe. Ya hu'ehina'mu Yesu ya'ma yagapananamu nogonamu tamu'nise luto lu epito keheli'ehigo buya menohibe. ¹² To Yesu ai Hu'mamofifi lu emi'ehina ka'a ma luto ni'ibe:

Oho Hu'mao.

Kai kumu nogonamu tamu'nimagihi
enogobisalo ka lu epoloto,
to silaga li gehesa nehanalo
kai kumu nama luto kofokehi lilube.

¹³ To ai lu'ehina ka mone'a ma luto hiti ni'ibe: *Hu'mamofihu keheli ule'ale huto minalube*. To mone'a hiti ma luto ni'ibe: *Ya'ma nani'ni hiti to Hu'mau yagapana'i nimi'ehina'a hiti lali moneko koguna asaga'i nohune*.

¹⁴ To Hu'mamofihu yagapana'a enali ya'ma enugufa'ani hiti golaha'ani hiti ya'asigo minago nehanaya Yesu ana suhi huto lali lugufa to hapati li lolo hu'ehina. To ai'a nofilito ya'ma bona'i fililatanamofihu afo'afu ya'ma kaba bo, Sataha amuya'a hiti bomofihu Yesu amuya'a ho he'mito le'mo sibina hu'ehina yabe. ¹⁵ Ya'ma bona'magi fililatanamofihu enelesa lulata nasanauba asaga yupahi naga igo mine lite bite mine'ahanamagihi Yesu gulu ho epalalube luto yamofihu lolo hu'ehinamo ni'ibe. ¹⁶ Yamofihu nasana ya'ma agelo enele'mo bati huto ya enali'ani'mu enehe'malatafihe? O'le, ya huto meni'ibe, lali anokehelune. *Ai'a Abalahahi panana'a lali lele'mo bati huto lehe'molata nohibe*, lite mono bukugu fayahi keye'ahanamo ni'ibe. ¹⁷ Ya hu'ehina'mu Yesu ai lali'i mamufa gi letolata boti sipi bo komopa'a molo letoto to Hu'mamofihu gobisalo foya amuya moloto lilatanamofihu minalibe luto bona'i lali'i foipanati okala hu letalibe luto ya'ma ai henana hu'ehibe? Ai lali hiti gonamu tamu'a lolo huto'a fili'ehinamo ni'ibe. ¹⁸ To lali tegi huto lolo huloto'a keke'i luse'na kehelito fi taga hu etose'nagu buto folo'ehinamo ni'inaya yana'mu bona'i lalitoga fi taga hu epelelata nasana ya'ma huto hu limilenogo lehe'moto lubuto bilina'mu yabe.

Yesuhi gi'auba Mosehi be ligi'ehina

3 ¹ Ya hu'ehina'mu mono bo nalalu'nigita, kokulumagu naga'i lolo hilabe luto Hu'mau elesa molo lepi'ehina. Lenali keheli emilata nohutamofihu mono ka leli'ali bo to mamufa gi emilata bo sipi'a Hu'mau ho lifi'ehina bo, Yesuhi bu go bati hite bu ge'ehilo. ² Hu'mau ana foya lilibe luto le'mo ho tito lu eto'ehinalo ai'a ya'ma Moseu Hu'mamofihu yagapana'amagitoga minoto Hu'mau lu'ehinalo minose suhi huto foya afo'afu lolo huto minoto lubuto bilatanamofihu foya amuya moloto mino lito buto mino'ehinamo ni'ibe. ³ Nohi gilata nohina bomofihu gi'auba nopofihu gi'a be ligi'ehigo ana bomu'i bona'magi gi'a liyafa hilabe. Ana suhi huto Yesuhi gi'auba Mosehi be ligigo Yesuhi fana meha'a hofa to'ehina'mu yabe. ⁴ To nohi ya'ma li huto hulatamofihu ya'ma bona'magita gilata nohuta ni'inaya akeheli'ohune. To ana'ina silaga'i li huto hulata'a ya'ma Hu'mau ai'a lolo hu'ehina yabe. ⁵ Moseu ai Hu'mamofihu noha'a legi lolo hite nehana bonatoga minoto Hu'mau lu'ehinalo agoya hu

emito foya amuya moloto lito minoto Hu'mamofihu ka'a alahi lu huto hilinaga lu yege ho'ehinamo ni'ibe. ⁶ Ya huto mino'ehinaya Kilisitou ai ya'ma pana'auba Hu'mamofihu noha'alo lolo hi tegi hite mine'ahana bona'magihi kaba nohu epoloto Hu'mau lu'ehinalo foya amuya moloto lilata nohipe. Noha'aya lali ya'ma nohune. To yamofihu fa'mene'mu meni'ibe. Ana'ina le'mo babahi hu leto'ehina yana'mu luto ka'a li pili koto agoya hu emitto minoto komopatigu bati nohinogo keheli emitto mino lito nobinogo kanati su nehenogomo ya'ma Hu'mamofihu noha'a lolo huto nohune luto lilune.

Hu'mamofihu minoba minoba hepato bu nehetiluta ka'a

⁷ Ya hu'ehina'mu Sikalafu'uba lu'ehina ka'a ya'ma mono bukugu ma lite keye'ahana:

Yatai ya'ma lenali Hu'mamofihu nogo'a
keheli'ehilanamo,

⁸ ya'ma fa'mene ka meto Isilaeli bona'i
enali ipakafa helete siko hite
Hu'mamofihu mi'i melete nehana
ya suhi hite komopatini fi hekini lenogo
meminalo.

⁹ Tatatinigi enali analo
kufu kana'a 40 nobigo
ana'ina lolo huto moloto hu'ohunamofihu
be gelata hi'ahanamo ni'inaya
kegeiyo hi netete
nimi'i nama'i mele nete'ahanamo ni'ibe.

¹⁰ To nani yana'mu ka epekito
enali kumu ma luto
lu epolo'ohunamo ni'ibe.
Enali kana'amu kana'amu negi nagi
enegekesa kehelilata hi'ahanamo nehabe.
Enali nani kapo bu go bebe sete
bu galana'a mehi'ahanamo ni'ibe.

¹¹ Nani ka epekito ma luto lu laga huto
lu'ohunamo ni'ibe.
Enali minoba minoba nohuna hepato
bilune'mu menehana yagi
nani hiti meminalana'mu yabe.

¹² Nalalu'nimagita, lenalitogati mono komopatini go'nupa ginogo
minete mono ka keheli he'mite minoba minoba huse bo, Hu'mamofihu
lenemegesa hi emi lalagi kaba hite minalo. ¹³ Ya nehithe kana'amu
kana'amu to kanati fa'mene ni'inogo foipanamofihu fi taga hi etete mi'i

ma'i mololatanamofiji lenalitogati bo mone'mofiji amukele li etenogo komopa'a li hekini lo lalibe lite ai ekesa linogo ai ekesa linogo hite le'mo hetofa hite minalabe. ¹⁴Lali asaga'i hapi fito keheliya ise'na ya'ma to fifa ilata nohuta li gehesalo nehetilutamofiji ya'ma Kilisitohi agoyana'a guna moloto li pili koto nominota bona'i lolo huto nohilune.

¹⁵Kaga mone hiti mono bukugu ma luto ni'ibe:

Lenali yatai
 Hu'mamofiji nogo'a keheli'ehilanamo
 yamofiji lenali koyapa'i
 Hu'mamofiji ipakafa helete
 kegeiyo hi'ahana.
 Ya suhi hite
 komopatini fi hekini loleno
 ya mehilo.

¹⁶Yamofiji hiya bona'magi Hu'mamofiji nogo'a keheli he'mite hega helata hi'ahana? Moseu enele'mo ko hetago Iyipi metogati e'ahana bona'magi asaga'i enali'ani ya hi'ahanamo ni'ibe. ¹⁷Kiyi'afi kumu Hu'mau kehelito ka epekigo kufu 40 bu'ehinamo ni'ibe? Yamofiji foipana lolo hilet fa'mene ka meto fili gehesa hi'ahana enali kumu ya'ma suhi lolo hu'ehinamo ni'ibe. ¹⁸Ya hulago kiyi'afi kumu Hu'mau kehelito lu laga hu'ehina ka'a ma luto molo'ehinamo ni'ibe? Minoba minoba huse hepatoga bu menehetilana'mu yabe. Yamofiji ka'a keheli he'mite kegeiyo hilata hi'ahana enali kumu ya luto lu'ehina. ¹⁹Ya luto lu'ehina'mu ma luto keheli'ohune. Enali Hu'mamofiji ka'alo keheli he'mite aitoga agoya hu meemi'ahana enali kumu yabe luto minoba minoba huse hepatoga bu meneheti'ahanamo ni'ibe.

4 ¹To ya'ma minoba minoba hepatoga bu nehetilabe luto Hu'mau lu leto'ehinamo ni'ibe. Yamofiji kaga'a lu molo'ehinana su mehalube'mu hibe. Ya'mu lenalitogati kegi'a moneubafi moneuba ana kapogu buto tele bi haya kolo lalibe luto lelesati linagi kaba hu batil hilo luto nolune. ²To ka lamana'a enali'i lu epi'ehina'ago huto lali'i lu limi'ehibe. To enali ya'ma ka'a kehelilete komopa'anigu li memalago limito keheli ule'ale hite memino'ehina to enalitoga futu'ago mino'ehina yabe. ³Lali ka lamana'a keheli amuya moloto keheli'ohuta'amagita minoba minoba hepatoga bu nehetilata nohuto Hu'ma hiti lali hiti analo fuli nominone. Ya hu'ehina'mu Hu'mamofiji ka'a keheli he'milata nehana'mu yabe luto ai ma luto lu'ehina:

Nani enali'i ka epekiti lu laga huto
 ma luto ka molo'ohuna.
 Enali ya'ma minoba minoba huse hepatoga
 bu nehetite
 nani hiti meminalana'mu yabe.

Yamofihu metoga hapi fito ana'ina hiti silaga'i lolo huto lili'na'a su holoto mino lito buto minoto alahi sibigopa anamofihu ka'a lu'ehina. ⁴Ya hu'ehina kana'a 7 yupapo bu nobe ligigo yalo'i mono bukugu kaga mone ma huto ni'ibe: *Hu'mau ai'a ana'ina silaga'i lolo su holoto kana'a nayahi lugaga loemo heleko malago basu bi'ehina.* ⁵Yana higo ifoga ya'ma ma luto aku lu'ehina: *Enali ya'ma minoba minoba huse hepatoga bu nehetite nani hiti meminalana'mu yabe.* ⁶Bona'i mone'amagi kohe tete ka lamana'a kehelite Hu'mamofihu minoba minoba hepatoga mebi'ahana. Henabe lutobe? Enali ana ka'amofihu keheli amuya memele'ahana. Ya hite, Hu'ma hiti analo fuli memine'ahana. To mone'amagi kehelite aitoga agoya hu emite nohinalo bite ai hiti fuli mine'ahana yabe. ⁷Ya hu'ehina'mu yatai yupahi Hu'mau ya'ma bu nehetiluta kana'aaku'i molo'ehina. Ana kana'mu Hu'mau yatama kana bulago Tebitihi bagaguti lu'ehina ka'a ma luto mono bukugu lu moloto lu'ehina:

Lenali yatai ya'ma Hu'mamofihu nogo'a
kehelilanamo yamofihu
komopatini fi hekini lose
meminalo.

⁸To koyapa'i Yosua Hu'mamofihu boana'magihi enele'moto minoba minoba nasanamofihu hepa'amofihu legeya'a li huto hu epolo'ehinalo ni'itita, Hu'mau alahi kana'alo basu bise'na moneko kumu melitita'mu yabe. ⁹Ya hu'ehina'mu ma luto nokehelune. Hu'mamofihu bona naga'a lali minoba minoba huto minose'namofihu fuli'a mone fa'mene ni'igi ana huto koyapa'i Hu'mamofihu kana 7 yanagu basu bito mino'ehinamofihu bona'amagita ana huto mino'ohuta ¹⁰Hu'mau foya li su holoto mino basu bi'ehina ana suhi hite bona'i mone'amagi enali lili'na'ani li su hete'ani Hu'mamofihu minoba minoba huse'nalo mine malalana ya'ma Hu'ma hiti enali hiti mine'ahana yabe. ¹¹To lalitogati moneuba amuya memolose foipana nasanamofi kumu luto bona'i koyapa'i ka'a pelesa ite Hu'mamofihu minoba minobanamofihu hepatoga mebilune'mu enipakafa enehese kapolo bi'ahanamo analo'i bu lalunigi minoba minoba hepatoga bilune luto amuya malalune.

¹²To Hu'mamofihu ka'a ya'ma amuya moloto mino kosaba'na huto minalina'mu yabe. To emitai'i mone baga'a megesa'aga to okaba'aga heta pita huto ya'ma be ligito ni'ibe. Anatu laga humo limito lemehi komopati to felisati apilifati hiti i loko hulata nohibe. Ya huloto komopatitu kehelilatana to keheli laga hulatana yanamofihu hapa'a li huto hulata nohibe. ¹³To anal'ina li huto hu'ehina ya'ma moneubafi moneubafi Hu'mamofihu bulo ya'ma suguna'i nasana mone meni'ibe. Ai bulo melugu kokulumagu ana'ina silaga'i sa gi'ahanagu meni'ina to li hokolo huse'i ni'ibe. To mone yupahi lali asaga'i li lolo hulata nohutamofihu hapa'a yanamofihu Hu'mamofitoga tito ai bulo lu eminogoti ka foya li letalina'mu yabe.

Yesu lali'i pipi mamufa gi letolata bo nohibe

¹⁴ Yana'mu lali mamufa gi letolata bo pipi'a tito mino'ehina moneka nohuta bo Yesu Hu'mamofifi pana'a aisigo ya'ma kokulumagu Hu'mamofifi maha'aluga tito nohibe. To ana suhi huto nohu letana ni'inaya mono ka'a lulata nohuta yamofifi li pili koto lubuto bilatanamofifi ka'a keheli ule'ale huto mino lito buto minalune. ¹⁵ To mamufa gilata bo pipi boti ai kumu keta lebesigo ya nohutogo komopati lapa bise'namofifi kehelito lali'i bu logoto menohe'mi letabe. Lalitoga limi'i lama'i moloto lito nohinamofifi huto hulata nohina ana suhi huto aitoga mi'i ma'i moloto lito fato fato'mofifi huto hu'ehinamo ni'inaya aitoga foipana mone'a meni'inamo ni'ibe. Yana'mu ai lali kumu ginaga filata nohibe. ¹⁶ Ya hu'ehina'mu lali Hu'mamofifi kefa hisalo tubuto yalo lelesa meligo lehe'mose'na'a ni'igo tito babahi hinogo nehetilune. Ya nohinogoti keta huse nasana moneubafi moneubafi oto logobisalo neminenogomo Hu'mau ai'a lali kumu ginaga fi limilina'mu to lehe'malina'mu komopa'atu molo leto'ehina ya'mu luto nohinogo ana'asi lele'mo bati hilibe.

5 ¹Melugu bona'i enalitogati mamufa gilata bona'mofifi le'mo ho ti'ehinauba Hu'mamofifi lili'na'a lilito to bona'i enele'mo eto hu'ehina. Ai asaga bona'magitoga enali kumu yabe luto Hu'mamofitoga huto hu emiloto foipana'animofifi nasanalo lokiya fi emilabe luto enele'mo molo'ehina. ²Ana mamufa gilata bo ai'a hapa'a mone amuya memolose nohigo fato bona'magi kaga mekehelilata to foipana lilata nehanamagih fulu huto ginaga fi epite agoya hu epilata nohibe. ³Ya nohuto ai amuya memalalina'mu yabe luto bona'magi fi foipana'mu to ai'a foipana'mu hiti Hu'mamofitoga lokiya fi emilibe. ⁴Foya tito mino'ehinamofifi bo mone'i ai komopa'agutti kagalo ana foya lilube lutomo meni'ibe. Mamufa gilata bo mone'mofifi Hu'mau kehe ito le'mo eto higo foya'a ya'ma lu emilenogo bati huto lilina'mu yabe. Alonihi ya'ma koyapa'i Hu'mau kehe ito ema'alo anamofifi lolohu eto'ehinamo ni'ibe.

⁵ To Kilisitou ai ana suhi huto ai'amo keheligo tigo yamofifi mamufa gilata bo pipi bo lolo mehu'ehinamo ni'ibe. Yamofifi Hu'mau ma luto lu emigo lolo hu'ehinamo ni'ibe:

Kai ya'ma pana'nimo nohane.

Nani yamofifi yatai ya'ma

kele'mo huto nohube.

⁶ To kaga mone'a hiti ma luto lu emi'ehina:

Kai ya'ma Melekisitekihi babeyafa huto
mamufa gi emilata bo nagaluguti
huto hilata minomo buto

foto'i moloto minalane.

⁷Yesu ai metoga mino'ehina kana'alo Hu'mamofifi kehe sipi igo bu nogoya nolimigo sipi nogo moloto buka tito ya'ma fili'ehinaguti le'mo gelehe higo yamofifi buto bise bo, Hu'mamofifi amuya moloto loka ho'ehina yabe. Ya higo Hu'mamofifi maha'aluga limito mino'ehina'mu luto to agoya hu emise'namu Hu'mau keheli emi'ehina. ⁸Ai Hu'mamofifi pana'a nohinaya fa'mene ya'ma keke'i luse'na keheliloto keheliya ise'namofifi hapa'a keheliya ito agoya hu emi'ehina. ⁹Ya huloto bu segito mino'ehina bo lolo huto ai ka'a keheli emi'ahana silaga bonatoga enali'i enubuto bise'namofifi nekisa'a meni'inamofifi afo'anifu lolo hu'ehina. ¹⁰Ai ya'ma lali'i mamufa gi limilata nohina bo, sipi bo Melekisiteki ai'a nagatogati babeyafa huto minalibe luto Hu'mau lu yege ho eto'ehina yabe.

Mono ka he'mi lalabe luto lipoti lu nolimibe

¹¹Yamofifi ka'a babu luto ni'inaya lenali lengekesa legeso hite kehelilatanamofifi tupa'asi nehinogo lu lepilube luto keheli'ohuna komopatini keta nohibe. ¹²Lenali kana'a yatama mono ka kehelite biba biba hite minatita luga'a fi lehe tete guyaka guyaka lite li epitita batihitine. To ya'amagihi lenali mono'mofifi hapi fise'na'alo ya'ma aku'i lu lepilatanamofitoga mine mele'ahabe. Lenali komopatinimofifi nose'na amuya'a hiti menalana'a hite minalana legegeto nehabe. ¹³Ya'ma fono ka ni'inaya olopa bona'magi amuya'a hiti nose'na nenanaya amihi nelata nehana'a enali inapuhi nehabe. Nehabe luto lu epalalutaya ya'amagihi mino fu lite minose'namofifi hapa'a ya'mu mone keheli fotogo menehabe. ¹⁴Nose'na amuya melete yamofifi olopa bona'magi enali nasana ni'ibe. Enegekesa komopa'ani hokolo higo foipanamofifi batinamofifi hapa'a keheli bebe sete nehana enali nasana ya ni'ibe.

6 ¹Ya'mu ya'ma lali ya hu'ehibe luto Kilisitohi kaga'amofifi biha'a hapi fi'ehinamofitoga ya'ma melenogoti ni'inogo ka'amofifi megesa'a lolito tito nebinogo bebe sose kaga lulatanamofifi kapo'a ya'ma moloto mino lito buto bilune. Mono kamofifi luga'a ya'ma tafa'a nomoloto futu'amofifi foya henabe luto aku'i hapi filune? Komopati lemeha'a li gelehe hilatana to Hu'mamofifi keheli emilata nohune. ²To mono nagami'i fololata nohuta ka'a to lataha'anilo layahi moloto lusa gilata nohuta to filise'naguti ho tise'na to foipana lolo hu epoloto ka foya lilata nohuta buba buba huse'namofifi kaga'a hena'mu aku'i yamofifi lito hapi filune? ³Hu'mau keheli'ehinogo lali ho tito abilune luto kohe toto kapo lamana'agu malalune.

⁴To mono ka keheli'ahana bona'i luga'amagi nehinogo Hu'mamofifi fana meha'uba komopa'ani le'mo besa lago to kokulumaguti nose'na nete enele'mo'ehina to Sikalafu'i mone'i li'ahana enali yanamofifi

enemegesa hi emite minenogomo hena hinogo aku'i enele'mo gelehe huto tiligi salune? ⁵To enali Hu'mamofiji ka'a hetofana ni'ibe li'ahana to alihia huto hilina kana'amofiji ule'ale huse'namofiji amuya'a laga'a akeheli'ahana. ⁶Enali ya hite minete alihia aku'i ya'ma asaga'i li he'mite enemegesa hu emi'ehilana yanamagi Hu'mamofiji pana'a aku'i malipu yafalo hete boana'magihi enubulo le'mo yege fise'na kalana'i mele etalana kehelilina ni'ibe. Ya'ma bona'i komopa'ani aku'i enele'mo gelehe hinogo tiligi solata hilinamofiji mone meni'ibe.

⁷Me'i monetoga ko'uba kana'amu kana'amu iba iba huto minoto le'mo gefa gefa noigo bona'magi foya lite nose'na he kelelata nehago nose'na li huto huto hu epilata nohinamofiji ya'ma Hu'mau lusa'amofiji legeya'a huto hulata nohibe. ⁸To me'i monetoga foyaguti kifina to kifi kasoa'hiti nasanago mino baga ilata nohina'mu yabe luto ka me'i lolo huto minana'mu Hu'mau gumi'i halifi mehalibe ai foya'a yabe. To ana metoga logouba lalube'mu hibe. Ya'ma fono kaguti me kumu lu'ohuna yamofiji me'mofi kumu menolube. Bona'magi kumu lu moloto nolunagi kehelilo.

⁹Nalalu'nigitabe, nani ka noluna ya'ma lenali le'mo tiligi salabe luto keheli'ohuto menolube. Lenubuto bise nasana yamofiji legeya'a lenalitoga huto holito buto minalibe luto keheli'ohuta nolube. ¹⁰Hu'mau ai'a mone li sibina huto ya huto menohibe. Lenali ai kumu yabe lite foya'a lite komopatini minalanamofiji lamana'a yamofiji Kilisitohi yagapan'a enele'mo bati hite lenemehi emite enehe'malata nehanamo yamofiji ai'a yana'mu ekesu mehalina'mu yabe. ¹¹Lenali kumu ya hilabe luto nolube. Lenali asaga'naloga moneko legege hite keta mehuse hite minenogo lele'mo hetofa hilina nasana ya hilune lite fifa ite lengekesagu melete mine lite netinogo kana'a su halina yalo nehetilabe. ¹²To lenali fa'mene fuli meminese bona'i luga'amagi keheli ule'ale hi'ehite to koselei'i melenehenogo geba hilete minete ana'ina'mu lu molo lepolo'ehina yamofiji lilata nehana bona'magi bilata nehana kapo analo enigigusa ite bilabe luto nolube.

Hu'mau kaga lu molo'ehina ka'a

¹³Koyapa'i enalitogati mone Abalahahi Hu'mau kaga lu eto'ehina bo mone tito mino'ehinamofiji gi'alo lu laga hilube luto keheli'ehinaya sa huloto sipi bomofiji gi'a mone be meligilibe luto ai'asigo gi'alo lu hetofa huto lu molo eto'ehina. ¹⁴Lu moloto lu etoto ma luto lu'ehina: *Nani'ni ya'ma lusa aku'i gi ketalube'mu nohube. Ya huloto kai yagapanaka babu luto li futili huto li huto hu kimiluna'mu yabe.* ¹⁵To Abalahahi Hu'mau lu eto'ehina kaga'mu yabe luto koselei'i mehago geba huto mino lito buto legeya'a ligo ai'na lolo hu'ehina. ¹⁶Bona'magita yahi tito bo mone'mofiji gobisalo le'mo ule'ale huto lu laga huse ka nolinogoti lalitogati tito mino'ehina bomofiji gi'alo lu laga huto o'e lulatana

yamofihu huto mehilina'mu yabe. ¹⁷Yanamofihu Hu'mau ai'a bona'i lu molo epolo'ehina yamofihu Hu'mau kenetufa'a le'mo gelehe huto fato ka lilifihe? lite enegekesa loemo kehelihalabe luto komopa'atu kehelihetofa higo lu'ehina. Anamofihu hapa'a li huto hilube luto lu molo epolo'ehina nasanamofihu ka'amofihu gupisalo le'mo hetofa huto lu laga huse kaga ya'ma molo emi'ehina. ¹⁸Hu'ma ai faga faga ka'a meni'ina boubala li hetofa huto ka'a loemo lu'ehina ya'ma li ho tito limilago ai'a maha'aluga mino fala ki'ohuta lali ana'ina lele'mo keta mehuse lubuto bi'ehina yamofihu legeya'amu fifa ito li pili koto amuya moloto lilune luto kehelito minalune. ¹⁹Lele'mo babahi hu'ehina'mu luto fifa ito geba huto minalatauba komopatimofihu lukesati lolo hinogo nohinogoti kokulumalugu mono nohi komopa'aluga katatu'i hekini lo'ehina ya'ma nonugu ai kapo li hokolo higo Hu'mamofihu gobisalo lele'moto tilata nohibe. ²⁰Lali kumu yabe luto le'mo kohe to leto'ehina bo, Yesu ai yamofihu analo lele'mo kohe to lito buto sipi mono nopofihu komopa'agu bu neheti'ehina ai Melekisitekihi naga'a suhi huto lali'i mamufa gi emilata bo lolo huloto mino lito buto asaga kana'amu kana'amu bigo minalube'mu nohibe.

Melekisitekiu Hu'mamofihu mamufa gi emilata bo yabe

7 ¹To Melekisitekiu ai ya'ma Seleme hepatoga gihiti bo to Hu'mamofihu sipi bomofihu ai mamufa gilata bo mino'ehina. Abalahau ai fato hepato buto enighiti bona'magihi kalana'i moloto enoho logo'ehinalo i behe huto noago Melekisitekiu ai buto kapolo fo tula hoto Abalahahi be tigito lusa gi eto'ehina. ²Ya hu etolago Abalahau lubaguti bauna nasana leka soto guna mololoto nayahi loemo su hola hola higo molo'ehinaguti moneko moneko lito Melekisitekihi emi'ehina. Ya'ma Melekisitekihi gi'amofihu hapa'a lali katiguti ya'ma gihiti bo bebe sose'namofihu afo'afu mino'ehina. To Seleme hepamofihu gihiti bo mino'ehina hapa'a lali katiguti ya'ma fulu huse'namofihu afo'afu nohina yabe. ³Melekisitekihi ito'afugo afo'afugo mine'aha'inaya etigi'atiti mekeheli'ohune. Ai'a enigiko enagako bona'a asaga'i fenene hu'ehigo mekeheli'ohune. Enali hapa'animu sa sa hite li huto mehi'ahanamo ni'ibe. Ai minoto lito hu'ehinaya, ito'afu keto'ehina kana to minoto fili'ehina kana'a ya'ma mekeheli'ohune. Ai Hu'mamofihu pana'a legi huto mamufa gilata nohina bo molo emitio minomo buto mino'ehina nohibe.

⁴Sipi gihiti bo nohinagi kehelilo. Melekisitekiu ya'ma gihiti bo lolo huto nohigo bahalotifu legeya'a Abalahau ai minomo tito mino'ehina, aiya lubaguti bauna nasana lamana'alogalaka soto guna mololoto yogo fe'nohi nayahi su hola hola huto ni'inaguti Melekisitekihi moneko moneko li emi'ehina yabe. ⁵To Libaihi yagapan'a luga'amagi mamufa gilata bona'i minalabe luto lu epolo'ehina. Enali hiti boana'i enalalu'anigi hiti koguna

ite Abalahahi naga'i moneko koguna lolo hi'ahanamo ni'inaya enalitogati ana'ina luga'a huto hu'ehinaguti nayahi su hola hola higo ni'inaguti moneko moneko lila lila hilabe lite li'ahana ka'a li nupa hite nelite yamofihu lu laga hi epelete li'ahana. ⁶To Melekisitekiu ai ya'ma Libaihi li gehesaguti huto hu emi'ehina bouna ya'ma Abalahahi ana'ina'a silaga'i nayahi su hola hola higo ni'inaguti ya'ma moneko moneko'i li'ehina. Ya huloto'a Hu'mau lu eto'ehina nasana le'mo hetofa higo li keheli'ehina bo Abalahahi ya'ma lusa gito molo eto'ehina. ⁷To mineme tite nehana'a enali limite mine'ahanamagihi lusa gi epelelata nehana'mu yamofihu enebe ligi'ahana. ⁸Mone kegi'a ya'ma kuguhi koyo emilata nehana bona'i enali mineme bite fililana yamagi bona'magihi yogo fe'noha'ani nayahi su hola hola higo ni'inaguti moneko moneko'i lilata nehabe. To mone kegi'a ana nasana moneko moneko li'ehina bo Melekisitekiu ya'ma minoba minoba nohina bo yabe lite mono bukugu fayahih keye'ahanamo ni'ibe. ⁹⁻¹⁰Yata'a Libai ana kanaguai huto huto mehu'ehinaya, tata'afifi Abalahau nohigo Melekisitekiu fo tumala neha'igo Abalahau yogo fe'nohi li emi'ehina. Ana yupahi Libai tata'afifi gufa'agu ana suhi huto mino'ehina. To ai bonatogati yogo fe'nohi nayahi su hola hola higo ni'inaguti ana'ina moneko moneko'i lilata nehana bona'magihi bahalo'anifu nohuto Abalahahi meha'aga nohuto fe'nohi ana'ina ya'ma Melekisitekihi li emi'ehina.

¹¹Libaihi yagapan'a enali mamufa gilata foyamofihu kaba'alo ya'ma Hu'mau ai'a Moseu keya ka lu'ehina ka'a ya'ma Isilaeli bona'i epi'ehinaya anamofihu mamufa gilata nehana bomagi enali kapo bili'ahana yanauba buto i segito minaluta nasana li huto hitita alihia'a lokiya fi emilata bo mone fato'mofihu Melekisitekihi li nupa hi'ahanaguti henabe

luto huto hitine? Yesu huto huloto ai'a Alonihi babeyafa suhi huto memino'ehina. Ai Melekisitekihi li nupa hi'ahanaguti oto huto hu'ehinamo ni'ibe. ¹²Ya'ma mamufa gilata foya li'ahana yamofihu tafa'a enele'mo kosaba'i huto mone li huto hulenogo ana tafa'amofihu ka'a keya ka lu'ehina'a ana suhi huto topa nehenogo fato'mofihu kosaba ka mone huto hilina'mu yabe. ¹³To keya ka lu'ehina kauba Sipi Botimofitoga buto lilago ai lokiya fi emilata nehana sipi mono nonugu foyamofihu ya'ma Libaihi tata'agitoga li epele'ahana enali li nupa hi'ahanaguti huto mehu'ehina. Sipi Botiu ya'ma li nupa moneguti huto hu'ehina ya'ma ana li nupa hi'ahanaguti moneuba mamufa gilata sipi mono nonugu foya'a lilata menohina ni'ibe.

¹⁴Sipi Botiu ai koyapa bo Yutaha naga'aluguti huto hu'ehina yamofihu akeheli su hoto keheli'ohune. To Yutaha naga'magi enali mamufa gi emilata foya lilabe luto ya'ma Moseu fayahih koyoto melu'ehinamo ni'ibe.

Yesu Melekisitekihi babeyafalo hu'ehinamofihu ka'a

¹⁵To mone hiti anokehelune. Mamufa gilatamofihu yuhufa hapa'a mone fato'na ma huto hu'ehibe. Mamufa gilata bo mone Yesu ai'a

Meleksitekihi babeyafa suhi huto huto hu'ehina. ¹⁶ Ai'a gufatu huto hu'ehibe lite ka'a li melete li'ahana to lu laga hi'ahana hiti ya'ma ana babeyafalo mamufa gilata bo lolo mehu'ehibe. Ai mino lito buse'na mehi emito amuya'a hiti mamufa gilata bo mino'ehina ni'ibe. ¹⁷ Ai kumu mono bukugu ka'a ma lite fayah keye'ahanamo ni'ibe: *Kai ya'ma Meleksitekihi babeyafa huto mamufa gi emilata bo nagaluguti huto hilata minomo buto foto'i moloto minalane*, lite keye'ahana yabe. ¹⁸ Ya hu'ehina'mu ya'ma lu laga hite li'ahana kaga koyapa'i li'ahanamofiji amuya'a meni'inalo legeya'a mone huto mehu'ehina yabe lite le'mo kosaba hi'ahana. ¹⁹ Moseu keya ka lu'ehina kauba buto li hetofa hinogo minaluta nasana li huto holito mebu'ehina. To yanamofiji be liginogo fifa ilatana kosabaluguti manuhi epilatanamofiji lamana'a li huto hu'ehina yauba manuhi limigo Hu'mamofiji okaba'aga lebato bulata nohune.

²⁰ To ka mone hiti ma ni'ibe. Kosaba mamufa gilatana yauba Yesutoga huto hu'ehina ya'ma Hu'mau le'mo huto: *Kai mino lito buse mamufa gilata bo nohane*, luto lu moloto emi'ehina. Yata'a kohe tete mamufa gilata hi'ahana bona'i enali li hetofa hite Hu'mau lu molo'ehina ka melise fa'mene mamufa gilata bona'i lolo hite mine'ahana yabe. ²¹ Kosaba'i ya'ma ule'ale huto ka lu mololata nasana ifo'aga Yesuhi ai'a mamufa gi emilata bo lamana'a lolo huto nohibe. Ai fayaha ka'a Hu'mau lu molo emi'ehina ma luto ni'ibe:

Sipi Bouba amuya moloto
lu laga huto lu'ehina ka'a
ya'ma mehe'milina'mu yabe.
Kai mamufa gi emilata bo
minomo buto
amuya moloto minalatagihe.

²² Hapa'a ya suhi huto ni'igo Yesu ai'a ya'ma lu mu tifisemofiji ka'a legeya'amofiji yafa lapusa'a lolo hu'ehina.

²³ To hapa'a mone hiti ni'ibe. Koyapa mamufa gilata bo enali ya'ma foya molo emite lilune'mu filite bi bi nehago yamofiji ni'igi babu bomagi leelite bite mine'ahana. ²⁴ Ya hi'ahanaya kosaba'i ya'ma Yesu ule'ale huto minoba minoba huto minose bo nohibe luto mamufa gilata foya yamofiji molo etoto oba oba huto nominabe. ²⁵ Ya hu'ehina'mu minoba minoba huto nominana bouba ya'ma kana'amu kana'amu lali kumu yabe luto Hu'mamofitoga buka tilata nohinaya ai'a lubuto bise foya Yesuhi foya'amu luto Hu'mamofiji bulo bulata nohuta bo batu huto lamana'agu lele'mo moloto lili'nagu lele'mo hetofa hulata nohibe.

²⁶ Yesu ya'ma lali'i mamufa gi leto'ehina bo sipi'a nohinagi lele'mo batu hulata nohina bo nokehelune. Ai pa sose foipana meni'ina komopa'a fi fana tago lamana bo ai foipana nasana lilata bo enali tegi huto menohibe. Laga huto pa solata nohina bo Hu'mau le'mo saga hu'ehigo kokulumua

ifo'alo be ligi su hoto nominana bo minalina'a huto minolago bati huto ni'ibe.²⁷ Ai ya'ma mamufa gilata bo tafa'a enali tegi huto meni'ibe. Ai foipana'a hiti meni'igo kana'amu kana'amu kohe toto ai'a foipana'amu yabe luto mamufa gi emilatamofihu alahi bona'magihi foipana'animu kuguhi koyo emilata nohinamo ya'ma meni'ibe. Ai'a komopa'a hiti gufa'a hiti ya'ma li hetofa hu etoto kuguhi moneko'i ya'ma koyo emigo buto su ho'ehina.²⁸ Moseu keya ka lu'ehina ka'alo ya'ma bomagihi komopa'ani mone batu mehu'ehina bo enali mamufa gilata bona'i minalabe luto lu epoloto enele'mo ho ti'ehinaya, Moseu keya ka lu'ehina kamofihu gupisalo ya'ma Hu'mau le'mo amuya moloto lu laga hulata nohina kaga'a yauba ai'a pana'a ya'ma bu segito hetofa huto nominana bo minomo buto mino yatama huto minalina'mu yabe.

Yesu sipi mamufa gilata bo yabe

8 ¹Ka noluna yamofihu legeya'a ma luto ni'ibe. Lali'i mamufa gilata bo sipi bo ai ifoga kokulumagu Hu'mamofihu koli'a hiti kefa hisalo maha'aluga yahi lamaga'aga mino moloto nohibe. ²Ai sipi hetofa mono nohi ni'inaya ya'mamofihu nonugu mono yahusabe lamana'a lali kumu yabe luto Hu'mamofitoga kaga lulata nohina nasanauba mamufa gilata foya lolo nohibe. Mono yahusabemofihu lamana'a bona'magita gi'ohuta ni'igopa Sipi Bouba ai'a li huto hu'ehina ni'ibe.

³Le'mo mamufa gi emilata bo asaga'naloga enali gomolu nose'na to fato nose'na laita hilata nehabe lite keheli eto hi'ahana. Yana'mu lali mamufa gi emilata bo Yesu ai hiti Hu'mamofihu lokiya fi emi'ehinalo mino'ehina ya nohibe. ⁴To metoga Moseu keya ka lu'ehina ka'amofihu mamufa gilata bona'i enali fa'mene nehanamo ni'inaya yata'isi melugu mino'ehina ni'itita mamufa gilata bo meminatine. ⁵Enali foya'ani tafa nopofihu babeyafana ya suhi hite anagu lolo hilata nehabe to legeya'a ya'ma kokulumagu ni'ibe. Ana suhi huto Moseu ai mono kamofihu go nohi gilube luto nohigo Hu'mau ma luto lu emi'ehina: *Keheli'ohubo*.

Kosagu babeyafa'a kelepi'ohunamo ana suhi huto ana'ina silaga'i lolo hubo, luto lu eto'ehina yabe. ⁶To lu mu tifise'namofihu kaga tito ya'ma ai'a lu'ehina kaga sipi'a huto ti'ehina yanauba lukesa yafa'a lolo hu etago li huto hu'ehinamo ni'inaya go nohi gilina'mu ya luto lu eto'ehina ni'inaya yamofihu Yesu ai'a Hu'ma hiti bona'i hiti enele'mo hephilube luto lu mu tifi'ehina kaga kosaba'i yauba tito ya'ma ni'ibe. Ana suhi huto lokiya fi emilata foya ai'a lilata nohinamo yamofihu tito enali'ani foya'ani be ligi'ehinagi li hetofa huto hilina'mu yamofihu kaga lu molo'ehina kosaba'i huto yamofihu hetofana huto hilinagihe.

⁷Koyapa'a lu mu tifise kaga mino'ehina yamofihu hetofa legeya'a ho'ehinalo ni'itita alahi mone huto hilibe luto kaga'a huto mehitine. ⁸Ya hu'ehinaya Hu'mau ai ya'ma Yuta bona'magi kumu kehelina bebe mesago

ka'a ma luto lu'ehina ya'ma mono bukugu ma lite fayahi keye'ahanamo ni'ibe:

Minoto kana monelugu
 ya'ma Isilaeli bona'i to Yuta naga'i
 enali hiti lu mu tifise ka kosaba'i
 mone li huto hu epilube,
 yamofihu Sipi Bouba luto lu'ehina ni'ibe.

⁹ Kosaba ka lu molo'ohunamofihu
 koyapa'i afo'anigihi
 Iyipi metogati enele'mo alube luto
 enayato li'ohuna kana'a
 enali hiti lu mu tifise'namofihu ka'a
 lu molo epolo'ohunamo meni'ibe.
 Enali lu mu tifise ka'amofihu
 komopa'agu le'mo fotogo hite meminago
 nani'ni bu goloto
 ahe'mi epolo'ohunamo ni'ibe,
 Sipi Bouba ai'a ya'ma luto nolibe.

¹⁰ Koyapa kana'a bulago
 alih Isilaeli bona'i
 enali hiti ma luto
 ka'a lu mu tifilube'mu nohubu luto
 Sipi Bouba lu'ehibe.
 To nani lu laga huse kaga'ni
 enegekesagu melenogo'ni minalina'mu yabe.
 Ya huloto komopa'anigu
 fayahi koyo melenogo minalibe.
 To nani Hu'ma'anifita lolo huto minalugi
 enali yagapanan'i lolo hite minalanagihe.

¹¹ To limite neminana'a lagaso'a
 to tite neminana'a sipi bona'magi
 enali nani kumu keheli su hete
 kehelilanamo ni'inaya,
 yamofihu bo moneuba bo lalu'afihi to
 bo moneuba falu'afihi:
 Kai mele'isi Sipi Bomofihu hapa'a
 keheli fe lubo, luto ya lu emitu
 iyo iyo huto lu emilina'mu yabe.

¹² Ya hu'ohuna'mu kehelilune'mu nehabe.
 Nani keke'i nolu epoloto enali
 li sibi sibi hi'ahana'ani
 li he'mi epalaluna'mu yabe.

To foipana'animu aku negekesa mone
mekeheliluna'mu yabe, luto
Sipi Bouba ya lu'ehina yabe.

¹³ To Hu'mau ai lu mu tifise kaga kosaba'namofi kumu noluto koyapa'i mino'ehina kagamofifi tafa lo'ehibe luto lu'ehina. To ana'ina tafa loloto fulupa ito yamofifi nesi'a minoto su hoto fenene hilina'mu yabe.

Kokulumalugu mono nohi yabe

9 ¹Lu mu tifise'namofihi ka'a tafa'agu Sipi Bomofihi bulo lipi emilata nehana lu laga huse kaga ni'ina to mono nohi metoga mino'ehina. ²Yamofihi mono'mofihi go nohi ya'ma ya hite gi'ahana. Hasa mone fi laga hi'ahana mone okaba'aga mino'ehinamofifi gi'a sipi bebe sose'i yabe lite li'ahana. Anagu ya'ma libi'mo yatamalo to hita gigusa'a hiti mino'ehina to hisamofifi gupisa'alo ya'ma Hu'mamofihi bulo mele'ahana beleti nose'na lapelugu mino'ehina. ³To buto komopa'agu mone kesige katatu fi laga hago mino'ehina gi'a bebe sosemofifi legeya'a eto huse'i yabe lite mino'ehina. ⁴Anagu ya'ma tu'a hiti nasanamofifi lokiya fi emilata hita mone golitu lolo hi'ahana ya'ma mino'ehina. To bokisi golitu lolo hi ete'ahana ya'ma lu mu tifise'namofihi kaga'a ni'ina. Ya'ma bokisi anagu mana nose'na kokulumaguti limi'ehina nose'na mone'a somogu mino'ehina. Ana somomo golitu lolo hi'ahana anagu ya'ma mana nose'na mino'ehina. Ana bokisigu Alonihi fatusa bu'a hiti fi ho tilago mino'ehina. To lapelegusa efahi loemo ya'ma keya ka analo fayah keye malago mino'ehina. ⁵Ifo'alo ya'ma Hu'mamofihi fana mehenamofifi babeyafa'alo kene'i loemale'i etali foipana okala hu epololata hitalo ya'ma koke'na'atititu lite ifi telete mine'aha'ina. Yamofihi ka'a yatama hu lalibe luto asaga'na analina'mu molo emitu lu su mehaluna'mu yabe.

⁶Ana'ina ya suhi hite lolo hite mele'ahago ni'igo nohi buga'aga anagu tite ya'ma mamufa gi emilata bona'i enali kana'amu kana'amu tite foya'ani lite minelata hi'ahana. ⁷Nohi komopa'a monelugu ya'ma mamufa gilata bona'magihi sipi bo'ani ai'ago kufu mone'amofifi yupahi nohi komopa'agu tito mino'ehina. Ya huloto meme yagamagihi bulumaka yagamagihi golahi li hekigo ligo tito yata'a ai'a foipana'a hiti to alihia bona'magihi foipana sibigopa mino'ehina li'ahanamofifi mekehel'i'ahana yana'mu yabe luto hitalo ana golahi fepa kopa i'ehina. ⁸Ana'ina yanamofifi hapa'a ya'ma fana meha'a hiti Sikalafu'uba ma luto lu nolimibe: Nohi hasa luga'a ya'ma fa'mene ni'inogo bebe sose mono nonugu buto fololata nohuta kapo hokolo hu su meho'ehinamo ni'ibe. ⁹To ya'ma hasamofifi okaba'aga mino'ehina ya'ma kanalo metoga nominota'a nasana babeyafa'a huto ni'ibe. Yamofihi hapa'a kehelilotiti ya'ma bebe sose mono nonugu gomolu nose'na kuguhi keyete laita hilata nehana yanauba Hu'mamofihi bulo lipi emilata nehanamagihi komopa'ani le'mo

fotogo mehilibe luto nokehelune. ¹⁰ Yanauba enugufa'aga li molo'ehina ka'ago ya'ma ni'ibe. Lu laga huse kagamu'i nose'na fato fato'i to bai nagami'i nenanaya to enugufa'ani mono nagami'i okala hilata nehana yamofiji kaga'a ni'ibe. Ya'ma Hu'mamofiji ka'alo huto higo bona'magi mege'i melete bite nehinogo alih'a Kilisitou ana'ina le'mo bebe salina kana'a huto hilibe.

¹¹ Ya hu'ehinaya Kilisitou ai'a ya'ma ana'ina legeya'a li huto huto lu molo'ehina yamofiji mamufa gilata nehana bona'i sipi mono bo'ani huto hu'ehina. To Kilisitou ya'ma kokulumagu mono nonugu lili'na lito mino'ehinauba tafa go nohi be ligi'ehina to ya'ma ifo'alo mono nohi mone legeya'a lamana'a enayatu meg'i'ahana to ma metoga meni'inamofiji babeyafalo ni'inaya mino'ehinamo ni'ibe. ¹² Kilisitou ya'ma meme yaga bulumaka yagamagahi golapo li'ehina ni'igopa ai'a golaha'a hiti buto bebe sose go nonugu tito ya'ma nohi hasagu tilina kana moneko'i tito mina fi letoto lubuto bito mino kosaba huse'i limi'ehina yamofiji minomo buto minaluta'mu yabe. ¹³ To mememagahi bulumakamagahi golahi to bulumaka ikele'amofiji gulfalo logouba lo'ehina lahi folo epalalina nasana'mu bonatoga fepa fepa iloto enugufaga folo epalago bi fele afele tigo mine'ahana enali Hu'mamofiji bulo enele'mo bati hi'ahana. ¹⁴ Ya hu'ehinaya Kilisitou ai ya'ma minoba minoba Meha'auba fi hele hu etago ai komopa'a hiti gufa'a hiti bati huto mino'ehina yamofiji Hu'mamofitoga hetofa mamufa gi emi'ehina. Ya hu'ehina'mu Kilisitohi golaha'auba komopatilo i kolo'ehinamofiji okala huto foipa foya he'mi letoto lele'mo bebe solenogo mino kosaba huse bo, Hu'ma aitoga agoya hu emitio foya'a lilata nohune.

¹⁵ Ya hu'ehina'mu Kilisitou ai'a ya huloto lu mu tifisemofiji ka'a tafa'a yanagu bona'i mine'ahana foipana li huto hi'ahana yaguti li kele li letalube luto fili'ehinamo ni'ibe. Ya hu'ehina'mu bona'i yata'a lu mu tifise'na kagalugu mine'ahana Kilisitou foipanaguti gulu ho epolo'ehina yabe, luto fili'ehina. Tonofilito Hu'mau elesa molo epi'ehina bona'i enali minoba minoba husemofiji kokulumagu yogo fe'nohi lilabe luto lusa gi epalalina'mu yabe. Ya'ma bati hite lilabe luto Hu'ma hiti bona'i hiti enele'mo hepiloto lu mu tifise ka'a kosaba'i li huto huto molo leto'ehinamo ni'ibe.

¹⁶ Yogo fe'nopofiji kapo'a ma huto ni'ibe. Afo'afu fili'ehinamofiji hapa'a huto lu yege holenogo yogo fe'nopofiji ka'auba legeya'a henilina'mu yabe. ¹⁷ Ana bona'i kosaba'i bu hiti nohinogo yogo fe'noho nasanamofiji ka'a ya'ma fa'menego minalina'mu yabe. Fililenogo yamofiji legeya'a huto hilina'mu yabe. ¹⁸ Ya hu'ehina'mu ya'ma lu mu tifisemofiji ka'a tafanauba yagamagahi golahi he nekigo bu molo'ehinago bati huto mino'ehinamo ni'ibe. ¹⁹ Yata'a Moseu keya kamofiji fayah koyo'ehina asaga kaga lataha'asiloko leka soto lu yege hoto bona'i lu epigo keheli'ahana. To lu

epi su holoto bulumaka ikele'amagihi golahi to mono nagami'i hiti li sibi sibi huto segi osahi mone tupalo to sipisipi yagamagihi oka'ani safan'a moloto sa giloto yamofitu nagami iloto lepe tepe huto keya ka ni'inalo to silaga boana'i nehanalo folo epolo'ehina. ²⁰ Ya huto'a ma luto lu epilata hu'ehina: *Hu'mau lu mu tifise'namofihu ka'a lu laga hu lepolo'ehina yamofihu golaha'auba lenele'mo bati hinogo lama'nakagalo kehelite mege'i malalo*, luto ligo kehelite mine'ahana yabe. ²¹ To Moseu ya'ma bebe sose go nohi ni'inina to anagu foyamofihu nasana asaga'i ni'inina yalo ya'ma golaha'a fepa kopa ito su ho'ehina. ²² Ya hu'ehina'mu ya'ma keya ka lu'ehina ka'alo ana'ina silagaloga mememagihi bulumakamagihi golaha'anitu okala hulata nohinamo ni'ibe. Golahi memalalana'a ni'inogo ya'ma bona'magihi foipana'ani li kele lilata'a mone meni'ibe.

Kilisitohi golaha'auba foipanati kele lilata nohina

²³ Ma metoga mono nasana silaga'namofihu hapa'a ya kokulumagu ni'namofihu babeyafa'a fa'menena golaha'atu nagami ite nokala hite li gulu gulu lilabe luto keya ka ya lu'ehinamo ni'ibe. To kokulumagu nasana lamana'auba ai'a ya'ma lokiya fi emilata nasana eto huto mino'ehina yanauba nagami ito hapa'a hetofana lolo hilibe luto le'mo hokolo hilinamofihu kapo'a moneko'isi ni'ibe. ²⁴ Ya hu'ehina'mu Kilisitou ai bona'magihi enayatu gi'ahana mono nonugu to lamana'amofihu babeyafa'a mino'ehina anagu buto meti'ehibe. Ai kokulumagu tiloto Hu'mamofihu bulo lali kumu yabe luto nehetito lele'mo hetofa hilina foya'a ya'ma lilata nohibe. ²⁵ To Yuta bona'magihi pipi mamufa gilata bouba kufu'amu kufu'amu hetofa kana'a moneko yupasigo bebe sose nonugu tito meme yaga mone'mofihu golahi lito tilata nohibe. Ya nohuto ai'a golaha'atugopa fa'mene nasanamofihu golaha'a lilito tilata hu'ehinaya Kilisitou ai'a gufa'a komopa'a ya'ma lali kumu yabe luto he'milube'mu kana babu yupahi meti'ehina ni'ibe. ²⁶ Yana'mu Kilisitou ai gufa'a komopa'a kana'amu kana'amu he'mi leto'ehina ni'itita ai me'mofihu lolo hu'ehina kana'a huto hu'ehinaloti ema'aga keke'i luse'i lito filito buba buba huto nesi'a meminotita'mu yabe. Ai'a ya'ma ya suhi hu emitio Hu'mau molo'ehina kana'a su halube'mu nohinogo kana'a moneko'i ai'a gufa'a komopa'a nehe'mito foipanati su halibe luto huto hu'ehinamo ya'ma su ho lamana hibe. ²⁷ Silaga bona'magita kana'a moneko'i fililune luto to yanamofihu ifo'alo Hu'mau nohinalo ai'a foipanati'mu ka foya lilube luto lu leto'ehinamo ni'ibe. ²⁸ Kilisitou ai ana huto kana moneko'i silaga bona'magihi foipana'ani ai gupisalo tigo he'mu kito Hu'mamofihu kuguhi koyo emiloto fili'ehina. Aku'i foipa nasana li su halibe luto ni'igopa aimofihu geba hite fifa ite minelata nehana bona'i Kilisitou enubuto bise foya alisha'a li su haluna'mu yabe luto aku'i kokulumaluguti limito huto hilube'mu hibe.

10 ¹Yuta bona'magihi keya ka ya'ma legeya'a alahi huto hilinamofiji babeyafa'a mone'a anasi ni'ibe. Legeya'a lamana'a meni'ibe.

Ya hu'ehina mamufa gilata bona'i enali keya ka lu'ehina ka'alo kufu'amu kufu'amu lokiya fi emi'ahana ana suhi hilenogo hena keya ka koyo'ehinamofiji kugupouba Hu'mamofiji bulo bilata nehana bona'i ya'ma mone'na lusiga luto enele'mo bati hulata nohibe? Ya huto meni'ibe. ²Hu'mamofiji lipi emilata nehana bona'i ya'ma mone'na komopa'ani li gulu ligo lu epolo'ehinalo ni'itita komopa'anigu foipana'ani meni'igo minatita'mu yabe to asaga kuguhi lokiya fi emilata'na ya'ma he'mitita'mu yabe. ³Ya hu'ehinaya kuguhi koyolata'namofiji ya'ma kufu'amu kufu'amu nekayago foipana'animuaku'i beto hite kehelilata nehabe. ⁴Kuguhi koyolatana'mu to lokiya fi emilatana'mu mememagihi to bulumakamagihi golahi heki'ahana yanauba bona'magihi foipana'ani nokala hu epalalina'a to he'milina'a mone meni'ibe.

⁵ Ya hu'ehina'mu ya'ma Kilisitou melugu ma'asi limilube'mu nohuto afo'afihi lu emi'ehina ka'a ya'ma mono bukugu ma lite fayah keye'ahanamo ni'ibe:

Kuguhi koyo epilata
ya'ma fato fato'mofi kumu
lagaka mekebesigo
ananamofiji kibita mehu'ehina.

Ya hu'ahataya,
nugufa lolo huto
le'mo hetofa hu'ahatamo ni'ibe.

⁶ Fato fato yagatu hete hosa hite
kuguhi keyete lokiya fi emi'ahana
yamofiji bu goto
laga'ni menebesibe luto lulata hu'ehina.
Foipana'ani he'mi su halibe luto
kuguhi keyelata nehago
mone kegelo mebilata nohane.

⁷ Ya hulago
nani ma luto lu'ohunamo ni'ibe:
O Hu'mao, kehelibo.
Kai lilata'a malalata'a hilube luto
kegeba huto nominobe.
Keya ka lu'ehina kamofiji fayah'a'agu
nani kumu kaga koyo'ehinalo
ya huto lilube luto nohube.

⁸ Kohe toto luto lu'ehina: *Yagamofiji kuguhi koyo emilata nehana to lokiya fi emilata nehana hiti fato fato'mofi kumu kegelo mebi'ahane, luto to fato fato yagatu hete laita hilete foipana'ani su halibe lite ana mamufa*

efaha hitalo gilata hi'ahana ya'ma ana suko huto bati mehu'ehinamo ni'ibe luto lagaka mekebesibe luto, yata'a ka lu'ehinamo ni'igo ya'ma anamofihu mamufa gilata foya ya'ma keya ka lu laga huto lu'ehina kaga'alo keyelata hi'ahanaya. ⁹To alih'a Kilisitou molo emit ma luto lu'ehina: *O Hu'mao, kehelibo. Kai lilata'a malalata'a hilube luto kegeba huto nominobe*, luto lu'ehina. Ni'inaya asaga mamufa gilatanamofihu tafa'a fato fato'i ni'igo Hu'mau li he'mito Kilisitohi ka'a ai'a keheli bati huloto Kilisitohi gufa'a mamufa gilata nohina yamofihu li molo'ehigo ya'ma kosaba'i li huto hu'ehina. ¹⁰Ya hu'ehina'mu Hu'mamofihu ka'alo Yesu Kilisito kehelito gufa'auba kana'a moneko kanasigo mamufa gigo lali asaga'i foipanati li he'mi letoto komopati le'mo eto higo nohuta'a ya'ma aku'i mamufa ai'a gilina'mu yabe.

¹¹Yuta bona'magihi mamufa gi epololata asaga bona'magitoga enali kana'amu kana'amu foya'ani lite ho tilete nehit kuguhi keyete lokiya fi emiba emiba hite minelata hi'ahana ni'inaya asaga yupahi ya nasanauba ya'ma bona'magihi foipana'ani nokala hu epalalina suhi mehibe.

¹²Kilisitou ya'ma foipanati su halibe luto ai'a golaha'atu mamufa gigo asu ho'ehibe. Yanamofihu gupisalo aku'i mamufa megilina'mu yabe.

To ya huloto Hu'mamofihu yahi lamaga'aga mino moloto mino'ehina.

¹³Yalo'i Hu'mamofihu fateha'a enele'mo lolo huto gigusa'atu iti kalube luto enegeba huto nohibe. ¹⁴Ya huto komopati li gulu gulu hinogo lele'mo eto hulata kapolo bulata nohutamofihu mamufa moneko'i giloto lele'mo fotogo hulata kapolo malago asu ho'ehinamo ni'ibe.

¹⁵Ya ni'inaya hetofa Sikalafu'uba ai'a hiti lu huto huto lu limi'ehinamo ni'ibe. Ai ka'a mono bukugu hapi fito ma luto ni'ibe:

¹⁶Alihi kanalo lu mu tifise ka'a
li huto hu lepalalube luto
Sipi Bouba ma luto nolibe:
Nani lu laga huto noluna ka
ya'ma komopatinigu molo lepelelengo'nii
liminogo
komopatini lengekesagu fayah keyenogo'nii
minalinamo ni'ibe.

¹⁷Ya luto luloto analo molo emit ma luto mone hiti lu'ehina:
Foipana'ani'mu to laga mehina nasana'ani'mu aku'i kana'amu kana'amu mekehelilube'mu nohube, luto lu'ehina. ¹⁸Ya luto nohigo foipana'ani lu he'mi epolo'ehigo ana foipana su holago ana'ina laga mehinanamofi kumu mamufa gilatana ya'ma ana suko huto su ho'ehibe.

Hu'mamofihu bulo nehetilune

¹⁹Nalalu'nigita, ya hu'ehina'mu Yesuhi golaha'auba bebe sose nonugu Hu'mau nominanamofihu kafe sigi letago lali nohinagu tiluta'mu

komopatigu lelesa melinogo ya'ma tilune. ²⁰Sipi mono nopoifihi hasalo li hokolo huto ya'ma ai'a gufa'a legi huto mino'ehinaya yanauba hekini lo'ehina katamofifi li beyaga i luga luga huto Hu'mamofifi maha'aga bulatanamofifi mino kosaba kapo amuya moloto minolata nasana ai'a le'mo lamana hu leto'ehina. ²¹Ai tiloto mamufa gilata bomofito sipi kibina bo lolo huto Hu'mamofifi yagapana'a lali'i latahatilo kaba boti nohibe. ²²Ya hu'ehina'mu komopati lusiga luto emiloto keheli ule'ale hinogo komopatigu okala huto foipana nasana'mu lekesa yigi yigi mehuse ya'ma ai'a golaha'atu lali'i okala hu su hoto folo letago komopati babahi higo to lugufati ya'ma hetofa nagami'i bu okaba'a suhi huto lolo hu'ehinalo nagamitu ko letelenogo minoto Hu'mamofifi bulu nehetilune. ²³Ya nohinogo Hu'mau ka'a lu molo'ehigo ana mololata bo aitoga buto lifita ito to fifa ito lulata nohuta ya'ma le'mo hetofa huto kaba huto mino'ehina yabe. ²⁴Komopatitu lemehi emitu komopati ai eminogo ai eminogo nohuto lili'nalo ai he'menogo ai he'menogo huto minalune luto komopati le'mo bati huse'namofifi kapo'mu sa sa huto minalune. ²⁵Ya nohutoti mono kumu li gehesa hulatanagu luga'amagi menehetise amanapa hite neminana'a nehabe. Ya hilata nehana enali suhi mehuse kana'amu kana'amu Sipi Bouba alina kana'a lebato huto nohinago yamofi kumu kehelito minoto enele'mo hetofa huto amuya moloto minalune.

²⁶To lali Hu'mamofifi ka legeya'a yauba komopatigu fi besa loleno go legekesa kehelito foipanaaku'i lilune luto nolunogo foipanati'mu ya'ma kehelito le'mo eto huto linogoti foipanati su halibe luto mamufa gilata nasana mone meni'ibe. ²⁷Ya huto ni'igopa yamofifi foipana'a babu luto ketanamofi kumu ligiki nebinogo geba huto minalune. Logo guluya meha'auba Hu'mamofifi luba li emilata nehana bona'i ya'ma akafu'i heni epalalina'mu yabe. ²⁸To Moseu keya ka lu'ehina ka'alo pelesa ite hauta halana bona'i ya'ma kene'i loemale'ifi loegi monegimagifi enali ka'ani lilago enali hapa hapa'ani foipana'ani huto hulago keke'i meli epelese mele'isi eba eba hite enoho fili'ahana yabe. ²⁹Yanauba keta hu tegi huto ni'inaya, bo moneubafi moneuba Hu'mamofifi pana'amofitoga megesa hu emilina to mino hepito mu tifise'namofifi kaga'alo golahi lepe tepe hu'ehina nasanauba komopa'a le'mo fana to'ehina yamofifi ai bu goto fa'mene lolo huto nohilina bomofifi Hu'mau hena hu etalina ni'ibe? To lehe'mose afo'afu Sikalafu'i yamofifi le'mo laba hilina ya'ma bomofifi Hu'mau hena hu etalina ni'ibe lite lenekesa nekehelibe. Ai le'mo sibina hu'ehinana'a sipi huto to keta'a hiti lilina'mu yabe. ³⁰Moneko'uba lili'na ka ma luto lu'ehina: *Foipana epilata nasana ya'ma nani foya'nimofifi mone kegi'a beletoga ni'ibe. Pa solatana ya'ma nani'ni pa salube*, luto lu'ehina. To mone hiti: *Sipi Bo ai yagapana'a enalitoga ka foya lito guna molo epalalube'mu nohibe*, luto lu'ehina bo ai hapa'a kehelilata nohune. ³¹Yalo'i kana'a sipi yupahi minoba minoba huse bo Hu'mamofifi yanugu fololata nohuta ya'ma koli'a hiti nasana felana ni'ibe.

³² Lenali koyapa'i ana'ina lolo hite mine'ahanamofiji aku'i kehelilo. Kana'a ya'ma yupahi komopatinigu Hu'mamofiji fana meha'auba fi fana to lepelenogo keke'i luse'namofiji komopa'agu minete keta'a hiti foya lite amuya melete lite mine'ahana. ³³ To kana'a loemo lenali lenagabu gise'nauba lenugupisalo tilago bona'magihi enubulo enumu fili enama fili hite kalana'i molo lepalago lenali fa'mene mine'ahana. To kana mone'agu ya'ma lenigibo lenalalutinighi ana'ina ya suhi lolo nehi epalago hite molo emite keke'i li epele'ahana. ³⁴ Lenali lenigibo lenalalutinighi naga nonugu nehago enali kumu yabe lite komopatinigu ekafa'i ho'ehinamo ni'ibe. To asaga fe'nohatini bauna fite lilago ya'ma komopatinimofiji fe'nohi lamana'a amuya moloto minomo buse'namofiji molo'ohune lite kehelilete lenegelo bilata hi'ahanamo ni'ibe. ³⁵ To yatai ya'ma Hu'mamofitoga lenifita ilata nasana mehe'milo. Ya nasanauba minoto alih'a mina'a sipi'a li huto hu lepalalina'mu yabe. ³⁶ Yana'mu lenali keta'a hiti'namofiji komopa'agu mino fulu hite minelenogo Hu'mau lilina malalina ka'a kehelite nehinogo ana'ina le'mo babahi huse'namofiji legeya'a lilabe. ³⁷ Ya hu'ehina'mu mono bukugu fayahi mone ma lite keye'ahanamo ni'ibe:

Kana'a hupamone ni'ibe.

Yamofiji su nehenogo

alube'mu nohinagihe.

Alibe lite li'ahanamo

ya'ma mino yatama mehuse

mele'isi nehetilina'mu yabe.

³⁸ Bona'ni lamana hi'ahanamagi

enali keheli ule'ale hite minete

mino kosaba'i lilete minoba minoba hilabe.

To luga'amagi enali he'mite i behe hite

bilana'a ya'ma enali kumu kehelugo

laga'ni menebesilina'mu negelo mebilube.

³⁹ To lali amuya memolose kosele kasele'i hoto minaluta'a to i behe huto tafa kapomofiji nasana lolo mehiluta'mu yabe. Lali ya'ma kehelito amuya moloto lemehi emitto lubuto bilatanamofiji nasana ya'ma lilune.

Keheli ule'ale huse hapa'a

11 ¹ Keheli ule'ale husemofiji hapa'a ma luto ni'ibe. Ana'ina le'mo bati nohu letana yana'mugopa keheliya ito fifa ito minoto yanamofiji geba hulatana to bu mego'ehilutana'mu komopatitu le'mo pili koto lito nohilune. ² Mono bona'i koyapa'i minete ho tite hi'ahanamagi keheli ule'ale hite minelata hi'ahana'a yamofiji Hu'mau bu enagago laga hulata hu'ehina yabe.

³ Koyapa'i ya'ma Hu'mamofiji ka'alo metoga nasana kokulumagu nasana hiti bu golata nohuta nasana huto hu'ehinamo yamofiji bu

megose suhi hinaguti huto hu'ehinamo ni'ibe, luto keheli ule'ale huto minototi keheliya ito keheli'ohune.

⁴ Ebeliu keheli ule'ale huse'na'a hiti amuya moloto ni'inalo Hu'mamofifi kuguhi koyo emi'ehinamofifi Hu'mau bu gago bati hu'ehina. Kenihi mone'na ya'ma bu go sibina hu'ehina. Keheli ule'ale huse'na ya'ma Hu'mau Ebelihi bu gago foipana'a meminago minoto kuguhi koyo emilago li'ehina yamofifi hapa 'a analoti li huto hu'ehina. To keheli ule'ale huto minana'mu luto lali kehelutogo Ebeliu fili'ehinaya sibigopa ka'a lu limilata nohibe luto kehelilune.

⁵ Inokiu ai keheli ule'ale hulata bo minago Hu'mau ai bu go bati huloto filise'na ya'ma aitoga huto mehilibe luto mino kosaba huse gufa hiti le'moto kokulumagu ti'ehina. Ya hu eto'ehina'mu ya'ma bona'magi ai kumu lite sa sa hite be mege'ahana. To meti'ehigo ai hapa'amu ya'ma Hu'mau Inokihhi bu go laga hu'ehinamo ni'ibe lite mono bukugu fayahi keye'ahanamo ni'ibe. ⁶ Keheli ule'ale huse'nati meeminenogo nehinogoti Hu'mau bu goto fokehi melilibi. Hu'ma ai'a nohibe luto yamofifi keheli ule'ale huto to ai hapa'amu amuya melete sa sa hilana bona'magi ya'ma mina'a limilibi luto komopatitu keheliya ito ai maha'aluga buse'na ni'ibe.

⁷ To Noa ai keheli ule'ale huse'na'a hiti bo mino'ehina Hu'mau alihu lipoti molo emilago ekesa kehelito kohe toto ka'a ekesa lito lu emigo Noau ya'ma kagalo keheli amuya moloto yagapana'a hiti enubuto bito minalabe luto ya'ma luloto nagamilugu boti sipi'a lolohu'ehina. Ya huloto Noau Hu'mamofitoga agoya hu emitio keheli ule'ale hilata yana'mu Hu'mau lamana bo nohane luto lu molo'ehina yauba ya'ma melugu bona'i foipana li'ahana'amagihi enifisa i'ehina suhi huto mino'ehibe.

⁸ Abalahau keheli ule'ale huse bo mino'ehina Hu'mau kehe ito ai me'i mone enali felisa fe'nohi minalibe luto kele'mo bati hilugi kai mekagati he'miloto mone kegi'a buto minalane luto kaga lu moloto lu emigo keheli emitio me'i magafi hiya'agafi lu'ehina ya'ma mekehelise fa'mene agoya hu emitio bu'ehina yabe. ⁹ Keheli ule'ale huse bo minana'mu luto me'i bu go molo eto'ehina yalo buto nehetiloto fa'mene minoto ka'i logo lili bo suhi huto yege nohi gito anagu koto mino'ehina. To Isaka to Yakopu etali hiti analo ya'ma Hu'mau lu molo epolo'ehina nasana'a lolo hite minete anamofifi gupisalo mine'aha'ina. ¹⁰ Abalahau ai keheli ule'ale huse'namofifi lapusa'a hiti nohi hep'a'i mone minoba minoba huse'i ya'ma Hu'mau minalinamofifi nasana'a lolo hu moloto li huto hu'ehina yanasmuko geba huto mino'ehina.

¹¹ Selau ai namopa litana'i nohigo Abalahau ai keheli ule'ale hulata bo minoto oyafa loloto yagapanan'a ketalina kana'a su hago amuya emigo yagapanan'a hiti hu'ehina. Hu'mau ya'ma bulo lu emilago legeya'a huto hulata nohina bouba lu huto hibe luto keheli amuya moloto ya suhi lolo hu'ehina yabe. ¹² To yamofifi ya'ma bona'i monekoluguti pulu

tilatanamofihu amuya'a su ho'ehinalo aitogati yagapana'a pulu ti'ahana enali kokulumatoga sonofi'i mineme bite ete samahi netina yanamofihu babeyafalo to hege nagami beleha'aga kehe'i ni'ina ya suhi huto bona'magita leka so su mehaluta Abalahahi tata'amagihi legegeto huto helite bi'ahana.

¹³Bona'i ya hana'amagi keheli ule'ale hite minete filite bi'ahana'a enali Hu'mau lu molo'ehinamofihu ana'ina enele'mo keta mehuse'namofihu legeya'a ya'ma mele'isi meli'ahana, fa'mene foto'i ni'igo be gelete ka'a lite kehelite li pili kete mine'ahana. Ya hite minete, hapa'ani ma lite keheli'ahana: Lali fa'mene metoga minoto bonoho bona to ka'i logo lili bona tegi huto nohune lite kehel'i'ahana. ¹⁴Kaga'a ya'ma lite lilata nehana bona'magi koto hep'a'ani mone li huto hilune'mu komopa'anitu kehelite mine'ahana yamofihu mino kosaba huse hep'a' i huto hilina'a geba nehabe. ¹⁵Ya hilet enali nohi hep'a'ani to me'ani he'mi'ahana yana'mu eniginaga figo mone kehelite ya mehi'ahana. Yana'mu epesigo ni'itita i behe hite fa'mene atine. ¹⁶Enali ya'ma nohi hep'a' lamana'a mone lilune'mu yabe lite ya nasana'muko geba hite kehel'i'ahana. Kokulumalugu yamofi kumuko keheli amuya mele'ahana. Ya hu'ehina'mu enali Hu'ma ai kumu Hu'matiga yabe lite lago kehelito megesa hu meepilata nohibe. Ya'ma hena'mube? Ai'a nohi hep'a' mone li huto huto enele'mo nupa hu'ehina'mu yabe.

¹⁷To Hu'mau Abalahahi fi taga hu etago keheli ule'ale hulata bo nohibe luto Isakahai lepa ito kuguhi koyo emilube luto keheligo amuya molo'ehina. Ai'a yagapana'amu Hu'mau lu molo eto'ehina kaga ya'ma li pili koto keheli'ehina bo nohinaya pana'a moneko'i ya'ma lepa ito kuguhi kayalube luto keheli moneko hu'ehina. ¹⁸To Hu'mau ka'a ma luto lu emi'ehina: *Isakatogati panana'a huto pulu tite bite minalana'mu yabe.* ¹⁹Abalahau ai Isaka kumu ma luto keheli'ehina ni'ibe. Hu'mau ai Isakahai fililinaguti le'mo ho tilibe, luto yamofihu keheli amuya moloto li'ehina bo to yamofihu fili'ehinaguti le'mo behe hu'ehina ya suhi lolo hibe luto keya'i molo etoto lu'ehina.

²⁰Isakau ai keheli ule'ale hulata bo mino'ehina'mu luto ana'ina alahi huto hilinamofihu ka'a Yakopuhi to Isauhi kaga lu moloto lu etimito lusa gi etoto'ehina yabe.

²¹Yakopu ya'ma keheli ule'ale huse bo nohibe luto fililube'mu nohuto Yosefehe pana'a loemo lusa gi etoto'ehina. Ya huloto fatusalo lito ho tito Hu'mamofihu lipi emitio fokehi li'ehina.

²²Yosefeu ai keheli ule'ale huse bo nohibe luto fililina kana'a tupa nohigo Isilaeli bona'i enali minete Iyipi metoga he'mite bilana'mu yabe luto kehelito ai'a felisa'amu kohe toto lu laga huto ma luto lu epi'ehina: Bilune'mu nehitemo ya'ma nani'ni felisa'ni hiti lite bilo.

²³Moseu huto hulago ito'afugo afo'afugo ya'ma keheli ule'ale hilata abbole neha'ibe lite yagapana'atiti'mu pana'i hetofanamo ni'ibe lite bu

go laga hilet Iyipi bo Felo, gihti bo ai lagaso pana'i asaga'i kele lilo, luto kaga moloto lina'mu yabe lite yamofifi etali etelesa meligo keheli he'mi'aha'ina. Ya nehite ikahi loebe monebe nobigo le'mo fala kite le'mo melete mine'aha'ina yabe.

²⁴ To Moseu keheli ule'ale huto minoto hofa tago Felohi pa'amofifi pana'a yabe lite lilata nehago Moseu o'e luto ya'ma nani ai pana'a yatai menohube luto lu'ehina yabe. ²⁵ To foipana nasanamofifi laga'a hiti tupa kana mino laba huto meminose'namofifi ya'ma he'miloto Hu'mamofifi bona naga'a enali hiti keke luse'namofifi gupisa'alo nehago yalo ai hiti molo emitio kehelilube luto mino eto huto mino'ehina. ²⁶ Ya huloto Iyipi metogati mone fe'no hiti mina'a sipi ana'ina ya'ma lilina kanamofifi keheligo fa'menena lololohi Hu'mau gulu ho letalibe luto lu molo eto'ehina bo, Mesia kumu yabe lite eniginaga fina'a gupisalo minalube luto yamofifi keheli ule'ale huto legeya'a lolo hu'ehina. Yamofifi minomo titi mina'a huto hilina'a lilube luto ana kaga'mu kehelito li pili koto ya suhi hu'ehina.

²⁷ To Moseu ai keheli ule'ale hu'ehina'mu yabe luto gihti bo, Felohi ita bilata nohina'mu ya'ma lesa meligo keheli he'mito Iyipi me'i ya'ma he'mi'ehina. He'miloto i behe huto aku'i analo mebulata nohuto Hu'mamofifi bu megolatanamofifi ai bu'atu bu go'ehina lolo higo aitoga buto i kolo'ehina yabe. ²⁸ To Moseu ai keheli ule'ale hu'ehina'mu yabe luto ligo mone nose'na sipisipi yaga hete keye lete bauna lilata nohina'mu Pasa yabe lite ana yagamofifi golahi kasito luga luga lepe tepe hite mine'ahana ya'ma nose'na kana Moseu lu laga huto lu molo'ehina ka'a Isilaeli bona'magi keheli'ahana. Enali yege pana'ani nehago enoho fililana agelouba bulenogo enoho su ho lalibe luto ligo enali ana golaha'atu nohi kasih yafalo fele'ahana.

²⁹ Isilaeli bona'i enali keheli ule'ale hi'ahana'mu yabe lite hege nagami'mofifi gi'a golaha nagamilugu li hokolo hu epalago ya'ma me'i kuguta hinaga bi'ahana. To Iyipi bona'magi ete ya'ma ana hite bilune lite ana sepa ina kapogu nebago hege nagami'uba enele'mo iti kago supa ne'ahana.

³⁰ Isilaeli bona'magi keheli ule'ale hise bona'i nehabe lite ya'ma Yeliko hepato efaha gegisalo ya'ma fi bego bego hite tibite kana 7 yege yupahi su nohago sipi gegisa'ani limilibe lite nebago fululu poto ko'ehina yabe. ³¹ Kapogu mokolo a'i Lehapu ai keheli ule'ale hina'mu yabe lite bo loemale'i yata'a fateha'animofifi me'i be galu'ibe'mu fala kite bi'aha'ina. Lehapu ya'ma ana bole noha'agu etele'mo malago alahi Yeliko bona'i Hu'mamofifi ka'a pelesa ilata hi'ahanamagihu ya'ma Hu'mau enohoto Lehapuhi buto bi'ehina.

³² Ya hi'ahanaya ka luga'a henabe luto lu su halube? Gitioni to Balaka to Semosoni, to Yepata, Tebiti, Samueli to kaga loli'ali bona'i enali kumu

ka lu su hoto liluna'a huto ni'itita lolito nobugo yatama hitine.³³ Enali keheli ule'ale nehana bona'i asaga'i nehabe lite luga'amagi melugu bona'i asaga'naloga enele'mete limite enebe ligi'ahana ya'ma enegekesa lise foya lite enele'mo fotoga hite Hu'mau mina'a epilube luto lu epolo'ehina yanamofihu legeya'a li'ahana. To luga'amagi lopi kalamagi henि letalabe lite ana kalamagihи enabagalо fi hekini le'ahana ya nehago,³⁴ luga'amagi logo guluya mepofihu kenetufa'alo li sabago ketipa i'ehina. To luga'amagi lubamofihu gupisalo netite fateha'animagi emitatu keyete enoho fililune lana'a he'mi epelete bifa hi'ahana. Kenebe mebi'ahana'amagi aku'i ya'ma amuya mele'ahana. Luga'amagi lubagu amuya melete me'i luga'agati kala bo'ani enohobe logobe hi'ahana.³⁵ Ana'i luga'amagi keheli ule'ale hina'mu yabe lite Hu'mau yagapana'ani fili'ahanaguti enele'mo ho tiloto aku'i ito'anigitoga enele'mo hepi'ehina.

To bona'i luga'amagi osahi enehete kalana'i mele epele'ahana ya'ma mono ka he'minogo lenubuto bilupihe lite kalana'i li epi'ahana alih'a'aga lamana huse'nagu ho tilune lite kehelilete fateha'animagihи kaga keheli he'mite fili'ahana.³⁶ Bona'i luga'amagihи fateha'animagi kiya hi epelete kalana'i mele epelete segi osatu enehe'ahana. To luga'amagi minago fateha'animagi enigito enayato naga'i gilete naga nonugu he'mi epele'ahana.³⁷⁻³⁸ Luga'amagi enali efa kosatu enehe fili'ahana, to luga'amagi ya'ma enugufa hobe laga hibe hi'ahana. To luga'amagi ya'ma sopolotu enehete enoho fili'ahana. Luga'a enali keheli ule'ale hite minana'mu yabe lite enoho lifi he'migo enali ka metoga bite fa'mene fakasalo minete to kosagu yup'a'i hite minete, mehi kapoluga to muli kapoluga kete humofa'na hite mine'ahana. Ya hite minete, i kolo bise gu'ani meni'igo sipisipimagihi mememagihи kalupa'a lite i kolo bite minete kau'namu filite minete, musufalo bona'i ya suhi hite minete to fateha'animagi enegene mane igo keke'i luse'namofihu gupisalo tite mine'ahana. Ya hi'ahana bona'i luga'a enali henana'aniloti melugu i hepite minenogo batи hilibe?

³⁹ Ya hana'amagi enali asaga'i keheli ule'ale hago Hu'mau bu enogo laga higo batи hu'ehina. Ya huloto aku'i Hu'mau hetofa nasana epilube luto ya'ma kaga lu molo'ehinamofihu legeya'a ana kanalo metoga mine'ahana'a enali ya'ma meli'ahana.⁴⁰ Henabe luto meli'ahana? Hapa'a ma huto ni'ibe. Hu'mau ai lalitoga ana'ina be ligito ni'ina'a molo letalube luto lu kehelito mino'ehina yamofihu enali kohe tete batи hite minalana'a ya'asigo meni'ibe. Alihi ya'ma lali hiti buto mino hepito bebe senogo minaluta nasana ya'ma li huto hilabe luto lu epolo'ehinamo ni'ibe.

Hu'ma lali afotifu nohibe

12 ¹Keheli ule'ale huse'namofihu hapa'a li huto hi'ahana bona'i samahi tite sopopo suhi hite minete lele'mo bego bego

hi'ahanamo ni'inagihe, yamofihu fifa ilata nehana bona'magi hololu lilata nehanamagihi hapa'ani'mu kehelito minoto keta'a hiti nasana ya'ma gololo tito li he'milune. To foipanamofihu hapa'auba lugufalo naga'i gi'ehina hiti li toba hoto li he'milune. Ya hulototi kapo lelepi'ehina analo kosele'i melehenogo hololu luto fotogo huto bilunagihe. ²Ya nohutoti keheli ule'ale huse'nati'mu lele'mo kohe tolatana to yanamofihu legeya'a li huto hulata bo, Yesu ya'ma babeyafa'amofihu suhi huto minoto aigo'isi bu go bati huloto hololu luto buto minalune. Ai gelo bise'na ya'ma o nehetibe luto lu'ohunamo yamofihu keheliloto li pigi bise'na fela'amofihu gupisalo ti'ehina'mu keheligo fa'menena lolo higo malipu yafalo sipi keke'i lu'ehina. Ya huloto Hu'mau nohina sekele mamu'a hiti kefa hisalo yahi lamaga'aga tito mino'ehina yabe.

³Foipa nasana lilata bona'i kegeiyo hite ita bi'ahana enali ya suhi hi emigo ai keheli he'mito amuya mololehina. Lenali ai kumu keheli emite kosele'i meleneheno. Komopatini hekini lo laligi ai'i li pili kalo. ⁴Lenali foipanauba lenele'mo ho kalube'mu nohinogo amuya melete luba nehago lenugufatini laga hago golahi mele'isi mehu'ehibe. Mineme bite minelata nasana yamofihu mino'ehinamo ni'ibe. ⁵To Hu'mau banana'ni yabe luto luloto amuyatini lito lenele'mo amuya moloto ka'a mone lu lepi'ehinamo ya'ma lenegekesu ho'ehifiye? Ya. Ka'a ma luto lu'ehina:

Pana'ni kai'i
 Sipi Bouba kele'mo bati hilube luto
 ka kemekinogomo
 osahi kimilina'mu kehelitogo
 sibina mehino.
 To foipa nasana'mu ka kemekinogomo
 komopaka hekini meleno.

⁶Sipi Bo ai komopa'a epilata nohina bona'i
 asaga'nalogia hima muhi fi epoloto
 enele'mo bati hulata nohibe.
 To ai yagapan'a lamana'a
 enele'mo mololehina
 silaga banana'amagihi segi osahi epito
 enele'mo fotogo hulata nohibe.

⁷Sipi Bouba osahi lepilenogomo kosele'i melenehenogo amuyatini gulu mefeno. Hu'mau bu gago ai panala'i pana'i lolo hinogo lenele'mo bati hilube'mu ya suhi lolo hu lepololata nohibe. To bo moneubafi moneuba pana'a osahi emitio le'mo bebe salina'a huto ni'ifihe? Enele'mo bati hulatana ya'ma bonatoga silaga'i ya suhi hilata nehanabe. ⁸To Hu'mau ai ana suhi huto yagapan'a silaga'i enele'mo bati hulata nohinabe, lenali'i ya'ma ya mehu lepelenogo minalana ya'ma panala'a pana'a lolo hite meminalana'mu yagi ya'ma kapolo a'mofihu pana'i yabe luto lu

lepalalina'mu yabe. ⁹To mone lilugi, metoga afotigi enali ya'ma segi osahi lahago lali kegeiyo mehuse enele'mo hofa toto agoya hu epi'ohutamo ni'ibe. To komopati afotifihi ya'ma ai maha'aga limito nohuto ya'ma bati hilube'mu nohibe. Ya hulototi mino hetofa hilinaga mino moloto minaluta'mu yabe. ¹⁰Afotigi enali'ani enegekesa kehel'i'ahanalo ya'ma fuku kana tup'aasi nobigo osahi limite lele'mo fotogo hite minelata hi'ahanaya, Hu'mau ai'a ya'ma ana'ina legeya'a li huto hu limilibe luto to ai'a bebe sose'na ni'inalo ya'ma molo emilabe luto ya hu letalube'mu nohibe. ¹¹Osahi limito lele'mo bati hulata nasana ya'ma huto hulenogomo kana'a kehelinogo laga menohigo keke'i luse'na'a hiti lolo hulata nohibe. To alih'a'aga ya'ma mino bati hulata'nagu minolata nohutamofihu legeya'a ya'ma i tili tele huto lalitoga fulunamofihu nasana huto hilina'mu yagi to hapati lamana'a lolo hulata nohibe.

Lipoti lu limi'ehina ka

¹²Ya hu'ehina'mu lenali komopatini haya kolo'ehina lenigi lenayah i kakite kalune'mu nehana ya suhi hite ate ate mehise amuya melete mineno. ¹³Mono'mofihu kapogu bilune'mu nehitemo lenigi sibina hu'ehina'a mine'ahana sibina hu su ho laligi aku'i molo emilenogo bati huto ye kolenogo Hu'mamofihu kapogu le'mo fotogo hilete humofa'na hilo.

¹⁴Lenali bona'i asaga'i enali hiti koguna ite minalune lite nelite to komopatini hepinogo mino eto hite minalune litemo amuya malalo. Komopa'ani kolo tago nehilana'amagi enali Sipi Bomofihu be megalana'mu yabe. ¹⁵Lenalitogati bo mone Hu'mamofihu lehe'mose'na li he'mito i behe huto bu laligi kaba hite minalo. Ya nehit komopatinigu ekesa'namofihu foipana moneuba leneme'na leneme'na bito lulata nohina ya suhi huto komopatinimofihu ekesa'nauba sipi hulenogo bona'i yege yege'magihi komopa'ani haya kolo laligi kaba hi epelelete minalo. ¹⁶Ya nehit lenalitogati moneubafi moneuba Isau bu'ehina kapolo mone mebilibe. Mokolo bona'i enali mino eto hite meminalata to metoga bona'i mone'amagi mono kagaloga mege'i memalalata ya suhi huto meminalune lite kaba hu bati hilo. Ya'ma Isau ai moneko nose'namu yabe luto ema'aga yege'a nohinalo alahi huto hu emilina felisa fe'nohi yama he'mi'ehinamo ni'ibe. ¹⁷Lenali ai hapa'a akeheli'ahabe. Ai alahi afo'afitogati lusa gise'na lilube luto noligo afo'afu o'e lu etago ana'ina lolo hu'ehinamofihu hena huto su halibe luto kehelito ya'ma sibina hu'ehinamofihu kumu komopa'a i behe huto ana lusa kapolo sa sa huloto aku meni'igo yibi hafili huto mino'ehinamo ni'ibe.

¹⁸Koyapa'i Isilaeli bona'i le'mo ya suhi hite Sainai kosalo li gehe lilata nehana beleha'aga ana suhi hite meabe. To fi'mo moneuba analo sipi logo loto guluya meha'agu ya'ma to sinahi metepu ginagu to yasi linagu

yamofihu komopa'agu bu mefele'ahanamo ni'ibe. ¹⁹Lenali Sainai kosaguti pikuli fi'ahana to nogo sipi mone molo'ehina mekeheli'ahana ni'ibe. Keheli'ahanamagi ya'ma ka'a mone'a hiti mekehelilune lite buka buka tite amuya melete mine'ahanamo ni'ibe. ²⁰Ya'ma nogouba ma luto lu laga huto lu epi'ehinamo ya'ma keheligo keta epesi'ehina: *Bona'i luga'a enali enayatu kosalo bako nehinogomo lenali efa kosatu enoho fililabe. To yagamagi asaga'i ana suhi hite lolo hi epalalabe.* ²¹Ana nasana ya'ma koli huse'na'a hiti sipi huto nohigo Moseu ya'ma bu goloto: *Nani yanamofi kumu nelesa'ni noligo afoya foya noube*, luto lu'ehina yabe.

²²Lenali kosa ya legi huto ni'igopa, lenali Yiona kosagu bite mehi mino lito minolata bo, Hu'mau ai nohi hepa'aga kokulumalugu Yelusale hepa tegi huto ni'ina hepato ime ime neheti'ahabe. Ya nehitte agelo leka sete leka so su mehose suhi hite samahi tite nehana, ²³to ai yagapana'a lamana'a enigi'ani kokulumalugu koyo molo'ehina'a enali enegelo bite li nupa hite minanalo bu neheti'ahabe. Ya nehitte asaga bona'i hapa'animu foipana'animu guna molo epalalina bo, Hu'mau nohinalo ime ime neheti'ahana. To lamana hite mine'ahana bona'i buto i segito minolata'nagu enele'mo molo'ehina'a enali suhi hite molo emi'ahanamo ni'ibe. ²⁴To lu mu tifise'namofihu ka'a kosaba'i li huto huloto folagahatigu nohina bo, Yesutoga abu neheti'ahabe. To koyapa'i Ebelihi golaha'auba ya'ma meluguti Ebeliu ho fili'ehinamofihu foipana'mu pa salibe luto lu'ehina. Ya huto ni'igopa, Yesuhi ai'a golaha'auba fepa kopa i'ehina yanauba lelito tito ana'ina legeya'amu fifa ito kehe ilata nohina yalo bu neheti'ahabe.

²⁵Lenali ka'a lu lepilata nohina ya'ma keheli mehe'mise kaba hite minalo. Koyapa'i Moseu ya'ma metoga minoto Hu'mamofihu ka'a mone lu epigo ka futu'a yabe lite he'mi ete'ahana bona'i enalitoga ana'ina enoho fililabe noligo koli'a hiti huto hu epi'ehinamo ni'ibe. Ya hu'ehinago yatai ya'ma kokulumagu minoto ka'a lipoti lu nolimina bo ai ya'ma lemegesa hu emitoti hena hena hinogoti lemehi mebinogo minalune? ²⁶Koyapa'i nogo'a ya'ma Moseu mino'ehina kana'agu me'i mopo mopo hu'ehina. Ya hulago nogo'a mone yatai lubutilo ma luto lu nolimibe: *Nani minoto me'i ya'ma aku'i le'mo mopo hiluna'mu yabe. To ya nohinogo kokulumaga hiti ya'ma moneko kumu le'mo mopo hiluna'mu yabe*, luto Hu'mau lu'ehina. ²⁷Ya'ma *aku'i le'mo mopo hiluna'mu yabeluto lu'ehina yamofihu ana'ina li huto hu'ehina ya'ma le'mo mopo huloto le'mo gehe lilube luto lu'ehina. Le'mo batu hulenogo ule'ale huse'nalohi lemehi emitio minolata'na mopo mehilina nasana ya'ma huto huloto mino lito buto minalina'mu yabe.*

²⁸Ya hilinagi lali Hu'mamofihu kapo'a lilune'mu nohutamofi kumu mopo mopo mehilina minoba minoba nasana lalitoga minalibe. Yana'mu lali Hu'mamofihu fokehi halutagihe. Ya huloto bita nohina'alo mege'i moloto aitoga legelo lagalo bito amuya'a hiti legeso huto agoya hu emino.

Ya nohinogo ai'a kehelito bu go laga hinogo bati hulenogo agoya hu emitu minalune.²⁹ Ya'ma hena'mube? Hu'ma, afotifu yabe. Ai'a ya huto lo su holata logo'a hiti nohina bo, ai'a nohibe.

Hetofana lolo huto nehinogo Hu'mau gelo bilinamofihu ka'a

13 ¹Mono kagu gona'a go'afihu komopatini ai eminogo ai eminogo hilata nehanamofihu ya'ma lenalitoga su meheno. ²To ka'i logo lili bona'i enebe tigite nohatiniluga enele'mo malalune lite kosele'i meleneheno. Luga'amagi enali bonoho bona'i atilo lite enele'me mele'ehite agelo nehana'muya enali mekehehi'ahana. ³Lenigibo lenagabo, mono kumu yabe lite lalutimagihi naga nonugu enele'mo mele'ahana'a enali kumu kehelite ana naga nonugu lali minaluta suhi hite nehabe lite kehelite lenekesu meheno. Ya nehiteluga'a enele'mo sibina sabana hi epele'ahana'a enali kumu keke'i luse'namofihu komopa'agu neminana'a ya'ma lenali ana hite keke'i luse'na'ani lenugupisalo suhi huto ti'ehina'a kehelite enali kumu lenekesu meheno.

⁴Bo alobole nemina'ina asaga'i ya'ma legeya'amofihu nasana'mu kehelie milabe. Bo alobolemale'i lolo neha'ina suhi lite li sibi mehilo. Mokolo'na to ate ate lite humofa'na nehana bona'i enali'i Hu'mau foipana'animofihu nona'a molo epalalina'mu yabe.

⁵Lenali komopatini yogo fe'notoga mebino. Ana'inatini li'ahana legegeto yana'mu babahi hite le'mo fulu hilengogo bati hite minalo. Hu'mau ai'a ma luto lu'ehina: *Nani mone mehe'mi lepalaluna'mu yabe. To nani lenalitogati mone bufa mehiluna'mu yabe.* ⁶Ya luto lu'ehina yana'mu lali amuya lilototi mono bukugu fayahi keye'ahana kaga ma luto lilutagi:

Sipi Bouba ai nele'mo bati hulata

nehe'mose bo nohinagihe.

Nani ana'ina yana'mu

coli mehiluna'mu yabe.

Bona'i enali hena hite

nele'mo sibina hilabe?

Yanamofihu nelesa melilina'mu yabe.

⁷Yata'a kaba botini Hu'mamofihu ka'a lu lepilata hi'ahana enali kumu beto hite minalabe. Ya nehitemono'mofihu kapo'alo nebite fili'ahana'a enali enigiyaka'a bu goya ite minete enalitoga enemege'i melete kehelii ule'ale hise'namofihu komopa'agu ya hite minelete lenekesa kehelilo.

⁸Yesu Kilisitou ai'a koyapa'i kohe toto mino'ehina to yatai hiti minoto ana suhi lolo huto mino lito buto minalina'mu yabe. ⁹To fato fato'namofihu kosaba kaga nelite li lenelepinogomo kehelite kaba hu bati hilo. Ana kagauba lamana kapo i pebisahete nebinogomo enemege'i memalalo. Hu'mau lenehe'mose'nauba komopatini le'mo hetofa hu lepelenogo ya'ma bebe salube'mu nohibe. Nose'na nolatanamofihu mo silatanamofihu lu

laga hi'ahana ka yanauba mone lele'mo bati mehilina'mu yabe. Yamofihu kapo'alo bi'ahanamagihi legeya'a mone li huto mehi'ahanamo ni'ibe.

¹⁰ Mamufa gilata hitalo mele'ahana nose'na ya'ma Yuta bona'magihi bebe sose go nonugu Hu'mamofihu agoya hi emilata nehana bona'i enali nalabe luto keheli meepi'ehina yabe. ¹¹ Lenali akehelihab. Mamufa gilata bomagihi kaba bo'aniuba meme yaga bulumaka yaga hoto ho gilito golaha'a ya'ma foipa nasanamofihu kolo tanana'ani nokala hu epololata mono nohi bebe sose nonugu lelito tilago ana yagamagihi gufa'ani bihu gegisaguti nosipetoga lelite limite logogu ge epelelata nehab. ¹² To Yesu ana huto ai'a golaha'atu foipa bona'magita komopati nokala hu epalalube luto bihu gegisaguti nosipetoga hago fili'ehina yabe. ¹³ Ya hu'ehina'mu lali ana huto Yuta bona'magihi koyapa'i mono gegisaguti nosipetoga aitoga limite gupisalo gili hite kiya hi'ahana nasana ana suhi huto lugupisalo tinogo kofilune. ¹⁴ Ya luto nekehelito ya hilune. Minoba minoba hepa'i mone maga lalitoga meni'igi fa'mene minoto hepa'i huto hilina'a yamofihu ya'ma komopatiuba geba hulata nohibe. ¹⁵ Ya'mu asaga yupahi lali Yesuhi gi'a le'mo saga huto labagaguti Hu'mamofitoga molo emitio fokehi hoto minaluta nasanauba lali mamufa gi emilutana lolo hinogo Yesuhi lu eminogo Hu'mamofihu lepilibe. ¹⁶ Hetofa foya lilatana agoyana hiti to fe'nohi guna ite epilune lite lengekesa kehelite minalo. Hu'mau ai'a yanamofihu kehelito bu go laga nohigo mamufa gi emilata nasana suhi huto legeya'a lolo hulata nohibe.

¹⁷ Kaba botinimagihi ka'ani kehelite agoya hu epite enali enigi'aluga limite minalo. Enali ya'ma lenemehatinimofihu nasana'mu kehelite babeyafalo kaba hi lepelete le'mo fu lite neminate enabasu mebilata nehab. Ya'ma foya'animofihu hapa'amu alahi kanalo ya'ma foya lilatana Hu'mamofihu bulo li huto hilana'mu yabe. Ya hu'ehina'mu foya'ani komopa'a le'mo bati hite lilabe linogomo agoya hi epelete ya suhi ma suhi li epalalo. To lenali pelesa ilenogomo enali keke'i nelite foya lilabe. Ya hinogo ya'ma lenele'mo bati hilina nasana lenalitoga huto mehilina'mu yabe.

¹⁸ Lenali lali kumu yabe lite Hu'mamofitoga kaga lite minalo. Lali eto huloto legekesa kehelise komopatigu bati higo keta huse'na meni'igo keheliya ito asaga yupahi eto huloto lito moloto hilune luto amuya mololata nohune. ¹⁹ Lenali Hu'mamofihu nani kumu loka halo, ya luto buka notube. Aitoga ka lu emilana nele'mo bati hulenogo ai hupamone kana nele'mo behe hinogo lenalitoga mele'isi bilube luto lu nolepube.

Hu'mau lusa gi lepalalibe luto lu'ehina ka'a

²⁰ Fulu husemofihi afu'afu, Hu'mau ai Sipi Boti Yesu ai'a golaha'atu lele'mo bati huto ule'ale hu letoto minolatana ya'ma minoba minoba mu tifise'namofihu ka'a li huto hina'mu yabe luto sipisipi yagamagihi kaba

bo'ani lolo hu'ehina bo fili'ehinaguti le'mo ho tito ho lifi'ehina bo nohigi,
 21 ai'a ya'ma nasana lamana'a fato fato'mofihu li huto hu leptito lenele'mo
 babahi hulenogo ai lilina'a malalina'a keheliya ilabe luto nolube.
 Ya nehinogo ai'a kehelinogo bu go laga huse nasana Yesu Kilisitohi
 amuya'auba komopatinigu mineno. To ai fana mehena'a huto hilenogo
 foke ka lelite binogo mino lito buto minalinamo ni'ibe. Lama'naka.

Ka'a anasi su halibe

22 Nigibo nalalu'nigita, nani kaga mone lu lepi'ohuna'a yatama
 meni'iibe. Lenali lenegekesa lito lufusatini li hetofa hilina ka'a ya'ma lu
 nolepugi lenekesa li hokolo hite kehelite minalo. 23 To lu lepilugi kehelilo.
 Lalalutifihi Timoti naga nonuguti gulu he ete'ahago ai mele'isi oto
 nanitoga nehetinogomo le'moto binogo ma'asi lenalitoga bilube'mu ai hiti
 bu lenagalu'ibe, luto nolube.

24 Kaba botinimagihi hiti to Hu'mamofihu bona'a asaga'magihi nehaifihe
 luto'ni keke'i nolu lepolonagihe luto nolunagi lu epilo. Itali metogati
 lenalalutinigi enali hiti nehaifihe lite keke'i neli epalago lu nolepube.

25 Hu'mau lehe'mose'na yauba lenalitoga minomo buto mineno.